

明史彙

列傳第一百四十三

光祿大夫

經筵講官明史總裁戶部尚書加七級

臣王鴻緒奉

數編撰

魏呈潤

胡良機

毛羽健

黃宗昌

吳執御

章正宸

姜琛

熊開元

魏呈潤字中嚴龍溪人崇禎元年進士由庶吉士改兵科給事中三年冬疏陳兵屯之策請救順天保定兩巡撫簡所部壯士大邑五百人小邑二三百人分營訓練而天津翟鳳翀通州范景文昌平侯恂竝建節鉞宜令練兵之外兼營屯田無何陳闕海勦撫機宜六事竝議行明年夏久旱求言疏言驛站所裁纔六十八萬未足充軍餉十一而郵傳益疲勢必

再編里甲是猶剜肉醫瘡瘡未必瘳肉先潰爛矣關外舊兵十八萬額餉七百餘萬今兵止十萬七千合薊門援卒非溢原數也乃加派五百九十萬之外新增一百四十餘萬猶憂不足可不爲稽核乎邊報日急非臣子言功之秋而小捷頻聞躡加峻秩門客廝養詭名戎籍不階而升悉糜俸料臣懼其難繼也江淮旱災五湖之間海岸爲谷舊穀不登新絲未熟上供織造宜且暫停至銓法壞於事例正途日墜不可不疏通而撫按諸臣捐貲助餉大抵索之民間顧奉急公之衷恐上蒙而下削不可不申明禁飭帝是其言已請大修北方水政條數策以獻帝納之熹宗時司業朱之俊署國子監議建魏忠賢祠國學旁下教有功不在禹下語置籍責諸

捐助及帝卽位委過諸生陸萬齡曹代何以自解首輔韓爌以同鄉庇之遂漏逆案及是之俊已遷侍講呈潤發其奸請與萬齡輩同棄西市帝特宥其罪而之俊由是廢棄請停罷內操宣府監視中官王坤論有司匿籍侵巡按御史胡良機帝怒奪良機官卽令坤按核呈潤言我國家設御史巡九邊秩至卑任至鉅坤劾良機卽褫職下坤究問良機在先朝曾糾魏忠賢削籍果犯罪有回道考覈之法在今乃以付坤不亦羞朝廷銷士氣乎今邊事日壞在十羊九牧既有將帥又有監司既有督撫有巡方又有監視一官出則增一官擾而中費赫赫之威又復十倍人見巡方之使獲戾中費莫自必其命誰復敢以國事抗者異日卽欲聞九邊聲息覈監視善

惡奚從知之乞召還良機寧使聽彈駁於部院不使仰鼻息於中貴帝責以黨比貶三秩出之外時御史李曰輔亦以論中官獲譴給事中吳執御吳南瀕御史蕭奕輔等交章論救不聽而御史趙東曦又疏劾坤亦獲譴呈潤以養母歸母服除起補光祿署丞甫半歲而卒良機字省之南昌人萬曆四十四年進士歷知臨淄益都二縣天啓初擢御史疏論乳媪中涓又請停內操楊漣擊魏忠賢良機亦上疏言忠賢之惡不減汪直劉瑾陛下過優容而閣臣不能據法爭豈真所謂門生宰相邪忠賢及魏廣微深憾以年例遷廣東參議良機方按貴州不候代而去遂斥爲民崇禎元年起故官按宣二鎮年滿當代褒以敏練令復巡一年尋爲坤劾罷久之

光祿典簿終南京吏部主事曰輔字元卿南昌人萬曆中舉於鄉天啓初爲成都推官巡撫朱燮元倚以兵事偕諸將攻復重慶釋脅從無算崇禎四年擢南京御史帝遣中官出鎮曰輔疏諫曰邇者一日遣內臣四尋又遣用者五非兵機則要地也廷臣方交章而登島陝西又有兩關之遣假專擅之權駭中外之聽啓水火之隙開依附之門灰任事之心藉委卸之口小臣不敏實爲寒心陛下踐阼盡撤內臣中外稱聖昔何以撤今何以遣天下多故擇將爲先陛下不築黃金臺勤招頗牧乃急急內臣是遣曾何補理亂之數哉帝怒鐫三級爲廣東布政司照磨歸隱西山香城寺攜一僕與居尋遣還與僧共晨夕而已然讀濂洛書不輟山居十餘年卒福王

復官東曦字馭初上海人萬曆四十七年進士歷知閩金華嵩三縣崇禎五年擢刑科給事中甫拜官卽言加派預徵搜括捐助悉苟且之政請興屯塞下以充軍用言路多囚首詔獄請稍加平恕容受直言報聞俄言頃以宣塞私和陛下赫然震怒逮巡撫沈棨罷本兵熊明遇乃監視者王坤方會飲城樓商推和議所需錢幣在坤掌握倘力持不可安從給發卽請之朝而沮之亦孰敢擅行坤不得辭扶同罪反上疏云邊烽已熄侈以爲功且有或候交代語夫內臣之遣陛下間一用之本非不易之典坤扶同擅盟邊臣倚爲護身之符欺蔽當日甚陛下卽盡撤各鎮監視猶悔不早坤尚欲請代圖彌縫於去後願陛下立正坤罪盡撤諸中使還京帝言宣

鎮擅和係坤奏發何謂欺隱命調東曦外任御史吳振纓給事中馮元廳等疏救竝切責無何給事中陳贊化以皇子誕生請宥罪復職其同官吳南灝亦救之竝不許謫福建布政司都事稍遷行人司正禮部郎中奉使還里福王時名爲給事中東曦已卒

毛羽健字芝田公安人天啓二年進士除萬縣知縣調繁巴縣崇禎元年徵授御史首劾楊維垣八大罪及阮大鍼反覆變幻狀二人遂被斥王師討安邦彥久無功羽健言賊巢在大方黔其前門蜀遵永其後戶由黔進兵必渡陸廣奇險難入七晝夜抵大方一夫當關千人自廢王三善蔡復一所以屢敗遵義距大方止三日而畢節止百餘里地平衍從此進

兵何患不克因畫上足兵措餉方略并薦舊總督朱燮元閔
夢得等帝卽議行後果平賊尋極陳驛遞之害帝令所司痛
革積困爲蘇溫體仁之訐錢謙益也御史黃宗昌備陳科場
本末言體仁熱中校卜欲割刃謙益遂以結黨二字爲舉朝
陷阱原體仁巧計所以破前此公論之不予且以箝後日言
者之口耳羽健亦憤其朋黨之說上疏曰陛下近者德業雖
益盛而過舉亦時聞如逐言官非美事也咈諫之主猶思護
其名我皇上乃不少介意名對至希邁事也本用以聯上下
交今乃有因而受黜者諸臣聞名攢眉蹙額以爲畏途校卜
甚盛事也今以相競而相讒因一人廢鉅典至黨之一字尤
不可開彼附逆諸奸旣不可用勢不得不用諸奸擯斥之人

若以今日之連袂登進者爲相黨而來抑將以昔之鱗次削
奪者爲相黨而去乎陛下不識在朝諸臣與奸黨諸臣之孰
正孰邪但觀天啓七年以前與崇禎元年以後之天下孰危
孰安便自可見今日語太平則不足語剔弊則有餘諸臣亦
何嘗盡負國家哉倘以一夫高張輒疑舉朝皆黨株連蔓引
一網打盡臣惜陛下從千憂百慮中得此清明世界復爲讒
人隳壞也帝責羽健疑揣而以前條陳驛弊原之已疏劾太
常少卿謝陞求巡撫於王永光及推薊鎮則畏而引病以避
後推太僕卿則不病陞王永光比爲奸宜并罪帝召對文華
殿永光力誡其誣且欲究主使之者大學士韓爌言究言官
非體帝不從已而獲宥帝御文華殿獨召對禮部侍郎周延

儒羽健偕同官李長春田時震上疏曰漢臣有言所言公公
言之所言私王者無私今名見不以師濟而以獨侍清問不
以朝參而以燕閒更漏已沈閣門猶啓延儒賢者必將形跡
自遠不冒昧以就功名如其不然何取於斯人而用之疏入
切責羽健既積忤權要其黨思因事去之及袁崇煥下獄主
事陸澄源以羽健嘗疏譽崇煥劾之落職歸卒宗昌字長倩
卽墨人崇禎初爲御史首請斥矯旨僞官言先帝賓天在八
月二十三日三殿敍功止先一日正當大漸時豈有安閒出
詔之理凡加銜進秩者皆魏氏官也得旨敍功冒濫者宜汰
宗昌爭曰臣所糾乃矯旨非冒濫也冒濫猶可容矯僞不可
貸帝令列名以聞遂列上黃克纘范濟世等六十一人請悉

行罷免帝以列名太多不聽尋劾罷逆黨尚書張我續侍郎
呂圖南通政使岳駿聲給事中潘士聞御史王珙俄劾禮部
侍郎周延儒貪穢數事帝怒停俸半年旣而劾體仁不納二
年冬巡按湖廣岷王禋洪爲校尉彭侍聖等所弑參政龔承
薦等報不以實獄不決者久之宗昌至羣奸始伏辜吏部尚
書王永光以宗昌不先劾承薦議鐫其四級遂歸時延儒體
仁已柄政矣十五年

大清兵圍卽墨宗昌偕鄉人拒守城獲全而子荃中矢死其
妻及三妾殉之李邦華薦宗昌未及用而京師陷又二年乃
卒莊烈帝初在位銳意圖治數召見羣臣論事然語不合輒
訶譴澄城人韓一良者元年授戶科給事中言陛下平臺召

對有文官不愛錢語而今何處非用錢地何官非愛錢之人
督撫監司郡守下至州縣佐貳貢監吏承鮮不以賄進給事
御史及館選亦然知縣則行賄之首用書帕不可數計薦舉
例謝考滿朝覲之費往往至數千金安得不愛錢至科道者
人謂之抹布言其只要他人淨不顧已污也臣兩月內辭却
書帕五百金他人可知乞陛下大爲懲創逮治其尤者追贖
庶可幾不愛錢世界帝大喜召見廷臣卽令一良宣讀欲用
爲僉都御史吏部尚書王永光請令一良指實一良以風聞
謝帝特召令密奏卒無所指帝怒責令再陳一良寤復舉周
應秋閻鳴泰等舊事爲言而語多侵吏部帝復召對出其第
一疏示閣臣且宜一良面奏帝欲一良實指當時事而一良

卒以風聞對因大失帝意謂大學士劉鴻訓曰都御史豈可輕授且叱一良前後矛盾復令指實以奏居數日奏上仍無所指又撫天啓朝事爲解帝益怒褫其官

吳執御字朗公黃巖人天啓二年進士除濟南推官德州建魏忠賢祠獨不赴崇禎三年徵授刑科給事中明年正月以帝視朝稍簡上疏切諫帝摘其中憑臆隨聲語切責之俄請急除掣簽法務使人地相配議格不行踰月疏言理財先保民請蠲畿輔加派示四方停免之期俾曉然知息肩有日庶不至召亂至捐助搜括亦宜速罷毋徒爲貪墨藏奸之藪帝復以沽名市德責之已劾吏部尚書王永光專務比擬聽毛洽薦用王元雅而封疆悞聽張道濬推舉尹同舉而祖制紊

至同臯兼金之餽不難自標爲例陛下懲貪法嚴而誨貪自
永光始官邪何日正寵賂何日清邪帝褒永光清慎不納其
言俄因風霾陳謹邊防擇守令二事報聞已上重學校敦風
俗諸疏帝皆採納帝以久旱求言執御應詔語極剴切已請
名黃克纘劉宗周鄭鄮忤旨譙讓無何言今日用兵必需餉
然往者敵兵闖入時袁崇煥王元雅擁數百萬金錢數十萬
士馬狼狽失守而史應聘王象雲張星左應選以一邑抗強
敵籌邊不在增兵餉在擇人畿輔東北及秦晉沿邊州縣宜
悉授精敏甲科賜璽書畀本地租賦俾撫練軍民自禦寇盜
邊關文武大吏繕修戰守之外宜兼責以理財如先臣王翱
葉盛輩所爲則客兵可撤而省餉至數百萬矣帝以歲賦留

本地則國用何資不聽已劾首輔周延儒攬權指其私狀
陳于泰及幕客李元功蔣福昌周素儒等交關爲奸利罪
旨切責已疏救魏呈潤李曰輔不納已陳陰陽內外之說言
今九邊中原廟堂之上無非陰氣心膺大臣未必皆君子帝
以其疏中所指陽剛君子無主名令指實執御乃以前所薦
三人及姜曰廣文震孟陳仁錫黃道周倪元璐曹于汴惠世
揚羅喻義易應昌對會御史吳彥芳言執御所舉因真君子
他若侍郎李瑾李邦華畢懋康倪思輝程紹皆忠良當用通
政使章光岳邪媚當斥帝怒其朋比執政復從中構之遂削
二人籍下法司訊時御史王績燦方以薦李邦華劉宗周下
獄而執御等復繼之朝端震駭言官共申救帝皆切責卒坐

三人贖徒三年執御初行取入都延儒遣元功招之不赴後
竟劾延儒其學以立誠爲本立朝更著風節久之卒彥芳字
延祖歙縣人天啓五年進士授莆田知縣崇禎四年擢御史
大凌被圍疏論孫承宗已駁故尚書呂純如辨竊之謬登州
用兵請撤監視登島中官至是譴歸久之卒績燦字偉奏安
福人天啓五年進士授興化知縣崇禎四年擢御史大凌被
圍都下震駭而新令禁邊報抄傳績燦言邊關既有其形中
朝何必諱其事致謠言四起民心淆亂惟發抄邸報庶忠盡
者得各抒所見不聽尋與給事中鄧英陳奸吏私派之弊已
復進賜環起廢容諫三說薦張鳳翔李邦華劉宗周惠世揚
遂獲罪屢薦不起卒福王時復官

正宸字羽侯會稽人從學同里劉寔有學行舉崇禎四年進士由庶吉士改禮科給事中疏請帝法周孔仁義黜管商富強則太平可坐致報聞禮部侍郎王應熊者溫體仁私人也廷推閣臣望輕不得與帝特命入閣輔政正宸上言應熊見擯廷推何緣特簡今事因多擾變以刻成綜核傷察宜存渾厚奈何復使很傲之人與贊平明之治哉因力諷其狼籍封靡請寢前命帝大怒下獄拷訊御史米助國金光辰龔廷獻給事中范淑秦吳麟徵傅朝佑論救皆不聽竟削籍歸九年冬有詔起廢名爲戶科給事中正宸因言起廢旨屢下而與臣同列名若詞臣劉必達楊世芳等已死乞敕所司速舉帝納之藥廠災壞公私廬舍無算正宸言火於五德爲禮

禮教不修火災乃見陛下臨御初未以沽名市德疑大臣頓
大臣救鄭三俊錢謙益忽爲是言是一無禮也史堃下吏疏
辨抵稱時局思箝衆口又一無禮也朝廷每一番令甲輒增
一番私營如吏部郎張樞芳以不謹被黜巧借城工復職非
陳啓新任怨抄參則考功之法可以金錢贖矣又一無禮也
災異頻仍聖心憂憫而戶部主事李鳳鳴謂善言不可退災
星亦一無禮也帝是其言時廠衛務羅織人罪而巡捕武弁
從而效之正宸言京師死刑視四方獨多其處決視四方又
獨速請申飭廠衛巡捕官帝令司巡捕者回奏氣勢少衰十
四年屢遷吏科都給事中周延儒再相中外仰望丰采而門
多雜賓正宸其門生也獨不宥附會十五年正旦朝會帝進

延儒等揖之待以師傅禮正宸因言陛下隆禮閣臣宜
積誠以格君心不與中官作緣不憑恩愆起見不以寵利居
成功不以爵祿私親暱語皆風延儒及宣大缺總督延儒欲
用宣府巡撫江禹緒正宸持不可吏部希延儒指用之正宸
復劾其行賄事帝不納延儒欲起江陵知縣史調元正宸止
之延儒再召頗得馮銓力欲以守涿功復其冠帶正宸與金
光辰力爭事遂寢尋詆兵部尚書陳新甲奸邪薦李繼貞李
邦華史可法孫傳庭可代及松山師覆請先正中樞破壞之
律然後正行聞失陷之條新甲遂獲罪旣而會推閣臣失帝
意謫成均州語詳李日宣傳福王立名復故官疏請亟檄四
鎮分渡河淮與江北山東協力互爲聲援且請編素率師駐

蹕淮上時不能用內傳用張有譽爲戶部尚書正宸以有譽雖有望而中旨不宜出抗疏力爭有譽卒以廷推用魏國公徐弘基等公疏薦張捷命下部議并議前戶部主事鄒之麟前御史張孫振劉光斗起用正宸分別論諸人稍寬捷而力詆之麟孫振光斗馬士英不悅擬論詰責回奏上獲免尋以安遠侯柳祚昌薦起用阮大鍼正宸又力爭且曰朝廷如此舉動邸報流傳見臣姓名尚挂仕版必相顧駭愕謂負掖垣職掌萬死何辭乞先放臣歸里士英輩忌正宸居言路遂用爲大理丞已見國事日非請假歸魯王監國起吏部左侍郎不受仍署舊官事敗棄家爲僧不知所之

吳琛字如農萊陽人崇禎四年進士授密雲知縣調儀真遷

禮部主事十五年擢禮科給事中山陽武舉陳啓新者崇禎九年詣闕上書言天下有三大病士子作文高談孝悌仁義及服官恣行奸慝此科目之病也嘉靖時三途竝用今惟一途而舉貢不得至顯官一舉進士橫行放誕此資格之病也舊制給事御史教官得爲之其後途稍隘而舉人推官知縣猶與其列今惟以進士選彼受任時先以給事御史自待監司郡守承奉不暇剝下虐民恣其所爲此行取考選之病也請停科目以絀虛文舉孝廉以崇實行罷行取考選以除積橫之習而蠲災傷田賦以蘇民困專拜大將俾得節制有司捧疏跪正陽門三日中官取以進帝大喜立擢吏科給事中屢遷兵科左給事中侍郎劉宗周御史詹爾選給事中房之

驥主事朱國壽先後論之歛人楊光先許其出身賤役及徇私薦故主布政使樊良樞與他納賄狀帝悉不究然啓新所條奏率無關大計御史王聚奎劾其溺職帝怒謫聚奎以僉都御史李先春議聚奎罰輕并奪其職久之御史倫之楷劾其請託受賕還鄉驕橫始詔行勘未上而啓新遭母憂塚因劾其不忠不孝大奸人詐御史李瑞和繼之乃削啓新籍下撫按追贓擬罪啓新竟逃去不知所之國變後爲僧以卒時帝以寇氛未息民罹鋒鏑建齋南城每子夜偕周后往誦佛經移時始返塚上疏諫不報已陳蕩寇二策曰明農業收勇敢帝善其言溫體仁興復社之獄七年未結塚言諸生率圍明經史無可罪而張溥一代著述才齋志以沒宜賁易名之

典時周延儒已復名當國事乃大解初體仁及薛國觀方排
異已及建言者延儒至盡反其所爲廣引清流言路亦蜂起
論事忌者乃造二十四氣之說以指朝士二十四人直達御
前帝適下詔戒諭百官責言路尤至採疑帝已入其說乃上
言陛下視言官獨重故責之獨嚴如聖諭所云代人規卸爲
人出缺者臣豈敢謂盡無其事然陛下何所見而云然倘如
二十四氣蜚語騰播清禁此必大奸巨慝惡言官不利已而
思以中之激至尊之怒箝言官之口逞邪詭之謀人效寒蟬
塞蔽至聽誰復爲陛下言天下事者如使耳目旁及邪言亂
政若涿州知州劉三聘忽薦罪輔馮銓人情閃爍是非淆亂
臣區區之愚不獨爲言官職掌更爲朝廷清治亂之源也先

是給事中方士亮論密雲巡撫王繼謨不勝任保定參政錢天錫因黃緣給事中楊枝起廖國遴以屬延儒及廷推遂得俞旨適帝有爲人出缺諭蓋舉廷臣積習告戒之非爲天錫發也採探之未審謂帝實指此事遂倉卒拜疏而帝於是時方憂勞天下至默告上帝戴罪省愆所頒戒諭詞旨痛切讀者皆感動採顧反覆詰難若深疑於帝者帝遂大怒曰採敢詰問詔旨藐玩特甚立下詔獄考試掌鎮撫梁清宏以獄詞上帝曰採情罪特重且二十四氣之說類匿名文書見卽當毀何故累騰奏牘其速按實以聞時行人熊開元亦以建言下錦衣衛帝怒兩人甚密旨下衛帥賂養性令潛斃之獄養性懼以語同官同官曰不見田爾耕許顯純事乎養性乃不

政奉命私以語同鄉給事中廖國遴國遴以語同官曹良直
良直卽疏劾養性歸功於已歸過於君若陛下無此旨養性
不宜誣謗卽有之亦不宜洩請誅養性因請并誅開元養性
大懼帝亦不欲殺諫臣疏竟留中會鎮撫再上塚獄言掠訊
者再供無異詞養性亦封還密旨乃命移刑官定罪尚書徐
石麒等擬塚戍開元贖徒帝謫以徇情執法令對狀乃奪石
麒及郎中劉沂春官而逮塚開元至午門竝杖一百仍繫刑
部獄明年秋大疫命諸囚出外收保塚開元出卽謁謝賓客
帝怒以語刑部尚書張忻忻懼復禁之獄十七年二月始釋
塚戍宣州衛將赴戍所而都城陷福王立遇赦起故官方丁
父讞不赴國變後流寓蘇州以卒疾革時語其二子曰吾奉

先帝命戍宣州死必葬我敬亭之麓二子如其言始天錫旣
得遷撫御史孫鳳毛疏發其事并劾輔臣陳演帝怒責諸臣
陳奏而鳳毛死其子訴冤指國遴枝起設計酖殺之兩人及
天錫竝削職下獄繼謨得留任塚弟垓字如須崇禎十三年
進士授行人見署中題名碑崔呈秀阮大鍼與魏大中竝列
立拜疏請去二人名及塚下獄盡力營護塚杖畢已死垓口
溺灌之乃復蘇後聞鄉邑破父殉難一門死者二十餘人垓
疏請代兄繫獄釋塚歸葬帝不許卽日奔喪奉母南走蘇州
大鍼得志欲殺垓乃變姓名之寧波國公獲解久之卒士亮
歙縣人崇禎四年進士歷嘉興福州推官擢兵科給事中甫
拜命與同官朱徽倪仁禎等謁大學士謝陞於朝房陞言人

手以不用聰明爲高今上太用聰明致天下盡壞又曰款事諸君不必言皇上祈籤奉先殿意已決諸人退謂陞誹謗君父洩禁中語仁禎國遴等交章論之斥陞大不道無人臣禮士亮及他言官繼之疏數十上帝大怒削陞籍已而士亮連劾諸督撫張福臻徐世廕朱大典葉廷貴及兵部侍郎呂大器甘肅總兵馬燠事多施行陳新甲主款士亮首劾之又請召舊諫臣姚思孝何楷李化龍張作楫張焜芳李模詹爾選李右謙林蘭友成勇傅元初而亟恤已死者吳執御魏呈潤傅朝佑吳彥芳王績燦葛樞帝頗採納尋論中官出鎮之弊詔極痛切周延儒出督師請士亮贊畫軍務延儒獲譴士亮亦削職下獄久之釋歸福王時復官國變後卒

熊開元字魚山嘉魚人天啓五年進士除崇明知縣調繁吳
江崇禎四年徵授吏科給事中帝遣中官王應期等監視關
軍馬開元抗疏爭不納王化貞久繫不決奸人張應時等
疏頌其功請以身代死俾戴罪立功開元疏駁之言化貞家
貲鉅萬每會朝審輒買燕市少年雜立道旁投熊廷弼瓦礫
嗾歎化貞不休以此熒惑上聽今應時復敢爲此請宜立肆
化貞甫朝化貞卒正法時有令有司徵賦不及額者不得考
題給事中周瑞豹考選而後完賦帝怒貶謫之命如瑞豹者
悉以聞於是開元及御史鄭友元等三人竝貶二秩出之外
開元不赴官久之起山西按察司照磨遷光祿寺監事十三
年遷行人司副左降官率驟遷開元以淹久頗歛望會光祿

缺丞開元詣首輔周延儒述已困頓狀延儒適有他事輒命駕出開元大愠會帝以畿輔被兵廣求讜言詔官民欲陳事者報名會極門卽日召對開元欲論延儒次日卽請見帝召入文昭閣開元請密論軍事帝屏左右獨輔臣在開元不敢言但奏軍事而出越十餘日復請見帝御德政殿秉燭獨坐開元從輔臣入奏言易稱君不密則失臣臣不密則失身請輔臣暫退延儒等引退者再帝不許開元遂言陛下求治十五年天下日以亂必有其故帝曰其故安在開元言今所講求惟兵食寇賊不揣其本而末是圖雖終日不食終夜不寢求天下治無益也朱子言天下之治在人主方寸間朝廷一二人而已陛下方寸無間若此一二人得人譬治病得良醫

拱手聽而病愈夫陛下臨御以來輔臣至數十人不過陛下
曰賢左右曰賢而已未必諸大夫國人皆曰賢也天子心膂
股肱而任用之易如此庸人在高位相繼爲好人禍天殃迄
無衰止迨言官發其罪狀誅之斥之已敗壞不可救矣帝與
詰問久之疑開元有所爲曰爾意中有人欲用乎開元辨無
有延儒等跪謝帝曰天下不治皆朕過於卿等何與開元言
陛下令大小臣工不時面奏而輔臣在左右誰敢爲異同之
論以速禍且昔日輔臣繁刑厚斂屏棄忠良賢人君子攻之
今輔臣奉行德意釋纍囚蠲逋賦起寤寤精賢人君子皆其所
引用偶有不平私慨歎而已帝責開元言私意開元奏辨延
儒等亦前爲解開元復請徧召廷臣問以輔臣賢否不嘗

輔臣心事明諸臣流品亦別陛下若不察將吏徂情面賄賂
失地喪師皆得無罪誰復爲陛下捐軀報國者延儒等奏情
面不盡無賄賂則無有開元復言敵兵入口四十餘日未聞
逮治一督撫帝曰督撫初推人以爲賢數月後便以爲不賢
必欲去之而後快邊方與內地不同使人何以展布開元言
四方督撫率自監司明日廷推今日傳單其人姓名不列至
期吏部出之袖中諸臣唯唯而已旣推後言官轉相採訪而
其人伎倆亦自露於數月間故人得而指之非初以爲賢繼
以爲不賢也帝命之退延儒等請令補牘從之當是時開元
本欲盡發延儒罪以其在側不敢言而延儒慮其補牘謀沮
之禮部郎中吳昌時者開元知吳江時所拔士也語開元令

商之大理卿孫晉兵部侍郎馮元颺兩人責開元曰若所言固當但首輔多引賢者首輔退賢者必盡遂矣開元意動大理丞吳履中至亦以開元言爲驟既退昌時復致書言之開元乃止述奏辭不更及延儒他事帝方信延儒又

大清兵未退焦勞甚得奏大怒令錦衣衛逮治衛帥賂養性開元鄉人也雅怨延儒次日卽以獄上帝益怒曰開元讒譖輔弼必使朕孤立於上乃便彼行私必有主使者養性不加刑溺職甚其再嚴訊以聞十二月朔嚴刑詰供主謀開元堅不承而盡發延儒之隱養性具以聞帝乃廷杖開元繫獄南京御史孫鳳毛劾楊枝起廖國遴因言開元面奏實二人主之欲令丘瑜秉政陳演爲首輔御史李陳玉亦言之帝以開

元已下吏不問十六年六月延儒罷言官多救開元者不報
刑部擬贖徒不許明年正月遣戍杭州未幾京師陷福王時
起吏科給事中丁母艱不赴唐王自立起工科左給事中連
擢太常卿左僉都御史隨征東閣大學士乞假歸汀州破棄
家爲僧隱蘇州之靈巖久之卒

明史藁

列傳一百四十二終

史藁

列傳第一百四十三

光祿大夫

經筵講官明史總裁戶部尚書加七級臣王鴻緒奉

彩編撰

許譽卿

華允誠

黃紹杰

李世祺

詹爾選

傅朝佑

莊龍獻
李汝棗

成勇

許譽卿字公實華亭人萬曆四十四年進士授金華推官天啓三年徵拜吏科給事中疏言錦衣世職不當濫界保姆奄尹織造中官李實誣劾蘇州同知楊姜侵撫按職中旨謂姜賄譽卿出疏將重譴輔臣力救停俸半年尋力諫立柳非法不聽楊漣劾魏忠賢譽卿亦抗疏極論略言忠賢大逆不道

跋扈無禮皇上試取漣疏一審閱之視漢之朋結趙嬖唐之勢傾中外宋之典兵矯詔謀間兩宮者何異忠賢殆合侯覽王甫王守澄仇士良童貫梁師成任守忠諸奸而爲一人其僭擬陵寢乘輿則又漢唐宋所未見臣敢繼漣之後昧死上言乞毅然乾斷割恩正法疏入忠賢怒甚已復陳時弊言內閣爲政本重地今票擬大權拱手授內廷每有傳諭動成闕帝絲綸之體掃地中旨之燄薰天在廷諸臣譴責接踵萬燦且杖死矣厥衛人犯一奉打問之旨五毒備施邇復用立枷士民槁項而斃者不知凡幾乃又行數十年不行之廷杖至流毒縉紳豈所以昭君德哉宦官不許典兵祖制也今禁旅日繁內操未罷聚虎狼於蕭牆之內逞金革於禁闥之中不

爲早除必貽後患疏奏忠賢益怒會逐趙南星高攀龍譽卿
偕同列論救遂鐫秩歸崇禎元年起兵科給事中時屢詔起
廢而當事者悉忠賢遺黨多方沮抑譽卿力爭已極論魏廣
微罪乞榜示朝堂褫其逆魄從之楊鎬王化貞未伏辜東江
大將毛文龍擁兵登萊索餉譽卿並劾奏南京給事中陳堯
言劾尙書王永光附逆璫不當正銓席帝切責堯言勅言官
入旨不得據風聞譽卿抗疏力爭已復陳五事規切廷臣甚
至都給事中薛國觀以嘗附忠賢恐京察被黜力許譽卿及
同官沈惟炳爲東林主盟結黨亂政譽卿上疏自白卽自引
去七年起故官歷工科都給事中明年正月流賊陷潁州逼
鳳陽譽卿慮其犯皇陵乞急調五千人防禦疏入而鳳陽已

陷皇陵毀焉譽卿痛憤直發本兵張鳳翼固位失事及內閣
溫體仁王應熊玩寇速禍之罪言賊在秦晉時早設總督遏
其渡河禍止西北一隅耳乃侍郎彭汝楠避不肯行又恐別
推一人則樞貳無色百計沮撓尙書鳳翼噤不敢言有詰
之者鳳翼曰政府不欲設也及賊入楚豫人言交攻不得已
議設侍郎汪慶百又避不肯行乃推極邊之陳奇瑜致鞭長
不及釀成今日之禍非樞臣之固位失事乎流寇發難已久
樞臣因東南震鄰始有淮撫操江移鎮之疏識者已恨其晚
及奉旨則曰不必移鎮臣觀各地方稍有兵力賊卽不敢輕
犯鳳陽何地使巡撫早移豈有今日今樞臣以曾請移鎮藉
口撫臣以不必移鎮爲詞則輔臣欲諱玩寇速禍其可得哉

祈急正諸悞國罪少慰祖宗在天之靈帝以苛求責之譽卿復上疏極論帝仍不問當是時言官吳履中等交章劾體仁應熊帝慰留二人譽卿上言今輔臣朝入暮出日取刑名錢穀瑣事批荅而理亂安危絕無一言且交相贊美恬不爲怪甲被論乙擬温旨留之乙被論甲擬温旨留之不曰忠悃則曰蓋畫不曰絕私奉公則曰弘濟時艱不知時事至此忠盡安在而奉公濟艱者又何事也皇上方下罪已之詔輔臣反得侈口稱頌乎帝仍不問譽卿又上言曰皇上臨馭有年法無假貸自庶僚以至大僚譴責時聞乃獨於悞國輔臣不一致問臣三疏入告無一語請罷斥蓋以黜陟功罪聽宸衷獨斷而進退廉耻聽輔臣自裁兩月以來輔臣安意入直退食

委蛇今巡撫楊一鵬巡按吳振纓已下詔獄矣輔臣未嘗席
藁待罪謂可超然事外乎昔年劉鴻訓錢龍錫有罪相繼遣
戍豈今日頓廢國法帝終不聽譽卿在天啓時謝陞方爲文
選郎及是陞長吏部而譽卿猶滯垣中以資深當擢京卿陞
希體仁意出之南京大學士文震孟愠語侵陞陞亦愠適山
東布政使勞永嘉賄營登萊巡撫主給事中宋之普家陞等
列之舉首爲給事中張第元所發帝以詰陞言路因欲攻陞
及都御史唐世濟譽卿以世濟恃體仁惡尤甚當先去之會
給事中姚思孝將劾世濟兩人因置陞不劾而御史張纘曾
又獨劾陞陞疑出譽卿及震孟意之普又構之陞先是福建
布政使申紹芳亦欲得登萊巡撫譽卿曾言之於陞陞遂疏

攻譽卿謂其營求北缺不欲南遷爲把持朝政地并及囑紹芳事體仁從中主之譽卿遂削籍紹芳逮問遣戍十五年御史劉遠薦劉斯埰姚思孝李汝璨李清楊潤宋學顯詹爾選喬可聘李右讜成勇等首譽卿給事中楊枝起薦成勇詹爾選姚思孝瞿式耜吳宗周喬可聘袁愷鄭之玄宋學顯熊開元何楷吳麟徵等亦首譽卿將起應天府丞帝復令覈議竟不果用福王立起光祿卿力辭不赴國變後薙髮爲僧久之

卒

華允誠字汝立無錫人曾祖舜欽瑞州知府祖啓直四川參政允誠早有志行受易於同郡錢一本天啓二年殿試對策極陳庵寺之害主者不敢進呈宣於二甲乃從同里高攀龍

講學首善書院已與攀龍先後旋里遂受業爲弟子傳其主
靜之學四年春從攀龍入都授都水司主事攀龍去官允誠
亦乞假歸崇禎改元起營繕主事進員外郎明年冬京師戒
嚴分守德勝門四十餘日不稍懈帝微行察知之賜白金及
叙功復加俸一年久之改職方員外郎謝絕請寄門庭肅然
五年六月憤溫體仁閔洪學亂政疏陳三大可惜四大可憂
言三四年來天子焦勞於上羣工鞅掌於下孜孜日不暇給
而法令滋章臣民解體人才蕩盡根本受傷夫以天子聖德
加之勵精何難坐躋至治乃當事者借皇上剛嚴而佐以舞
文擊斷之術倚皇上綜核而騁其持籌握筭之能遂使和恒
之世競尚刑名清明之躬寢成叢脞以聖主圖治之盛心爲

諸臣鬪智之捷徑可惜者一人臣趨事赴功止此精氣今但以窺矚微旨爲盡心指摘細瑕爲快意大僚驚魂於回奏諫臣奔命於守科直指風裁徒較事件長吏考課惟問錢糧遂使官守言責止歸簿牒之煩吏治民生盡成鈎較之務以多士修職之精神爲小夫趨承之能事可惜者二廟堂不以人心爲憂政府不以人才爲重四海漸成土崩瓦解之形諸臣但有角戶分門之念意見互觭議論滋擾遂使侷侷撫等於築舍忽用忽舍有若舉碁以興邦啓聖之歲時爲卽聾從昧之舉動可惜者三人至所以總一天下者法令也喪師悞國之王化貞何以與楊錡異辟潔已愛民之余大成何以與孫元化並逮甚至一事偶誤一言偶拂執訊隨之反使輕猾

者不以捍綱爲懼而矜矯者且以對吏爲榮刑罰不中鈇鉞無威一可憂也國家所恃以爲元氣者公論也直言敢諫之士一鳴立斥指佞薦賢之章非奸則黨不惟不用其言并錮其人又加之罪遂使人人相戒喑默求容是非共蔽忠讒互淆二可憂也國家所賴以爲防維者廉恥也今大臣握重權而有徒隸之心小臣占風氣而鮮特立之槩近者中使一遣妄自尊倨鮮與抗衡羣事阿諂皇上以爲近臣可倚而不知倖竇已開以爲可惟吾操縱而不知其屈辱士大夫已甚貪競成風羞惡盡喪三可憂也國家所藉以進賢退不肖者銓衡也古者丞相之職實兼今之閣部權太重而易以爲奸國朝罷丞相以用人之權歸吏部而閣臣不得侵焉今次輔體

仁與冢臣洪學以同邑爲朋比惟異己之驅除閣臣兼操吏部之權吏部惟阿閣臣之意造門請命夜以爲常統均大臣甘作承行之吏黜陟大柄祇供報復之私而且遍布私人脈暗通乎南北封疆重寄憂獨遺於君王甚至庇同鄉則逆黨可公然保舉而白簡反爲罪案排正類則講官可借題逼逐而薦劾遂作爰書陛下惡諸臣之欺欺莫大於此矣怒諸臣之擅擅莫專於此矣厭諸臣之黨黨莫固於此矣威福下移舉措倒置四可憂也臣區區之心願陛下尙德緩刑用賢去佞勿以至神至聖之資爲臣下所誤勿以治人治法之大爲奸邪所牽勿過於嚴致士氣人心日趨頑懦勿偏爲任致名流善類永錮清時使臣言得行卽治臣以出位僭越之罪臣

有餘榮矣疏奏朝士共危之允誠亦囑家人以身後事帝疑其受指他人責令回奏允誠乃列上洪學徇私數事言山東巡撫徐從治南京刑部尚書沈演南京右都御史唐世濟皆洪學鄉人其錦衣世廕乃雲南冒功所得并宜追奪且曰體仁生平終臂塗顏廉隅掃地陛下排衆議用之意其悖直寡諧或可倚仗豈知一厠揆路薰灼頓張又有如洪學者爲羽翼必欲收盡天下之私人戕盡天下之善類兩年來無一人敢犯其鋒者臣忠孝自盟豈肯受人指使帝褒體仁純忠亮節而摘其疏中握定機關語再令陳狀允誠復上言二人表裏朋比朝端共知年來政尚綜覈凡外廷一事之悞一言之訛政府無不抉摘小者引罪大者奪官乃兩月以來何獨洪

學事事盡善一無可挾摘乎洪學之言口每遇缺員必干請
不至者方登啓事也體仁之言曰門生不令推舉也乃溫育
仁銅臭小人文義不識部考之卷滿堂掩口而裒然首拔鄧
英論沈演而謫誰不知體仁私意而其劾羅喻義止以左右
非人一語爲所深恨遂遭斥逐此非事之章明較著者乎帝
亦悟兩人同里有私乃奪允誠俸半年而洪學亦旋罷去其
冬以省親歸事母色養備至母年八十三而終哀毀骨立服
旣闋未及赴京而京城陷福王立起驗封員外郎蒞官十餘
日見劉宗周高弘圖徐石麒等悉去位卽引疾歸允誠踐履
篤實晚年涵養益粹不以功名利祿動其心周延儒之再召
也遣人以京卿啗之拒不應及赴南都馬士英亦先詣卒不

報謝國變後屏居墓田不肯薙髮與從孫尙濂同被執至南京伏法

黃紹杰萬安人天啓五年進士授中書舍人崇禎元年考選給事中方需次劾南京御史李時馨徐復陽諂附逆奄罷之補授兵科薊遼總督曹文衡與監視中官鄧希詔相訐紹杰上言文衡烈士受內臣指摘何顏立三軍上宜亟更希詔亦不宜畱同官李春旺亦言之帝怒切責二人文衡乃自陳六罪乞罷帝不許而心頗不悅無何文衡以勞疾乞歸遂奪職閒住紹杰居久之屢遷刑科左給事中七年五月久旱求言紹杰上疏曰漢世每逢災異策免三公而宰執亦引罪求罷近因久旱陛下修明政治大納讜言可謂應天以實矣而兩

澤猶未降者蓋天有所甚怒而不解也去歲周延儒罷特召舊輔何如寵中外以爲君子道長轉否爲泰之時乃如寵徘徊道路不至者蓋君子小人不能並立有所疑畏而不肯前耳次輔溫體仁秉政數載上千天和無歲不旱暵無日不風霾無人不愁怨無地不災異無處不盜賊譬如庸醫已致人垂盡而猶不釋手將遂聽其俱盡乎且體仁秉政旣久窺矚自工中外諸臣悉承其喜怒一人當用則曰此與體仁不合者也一事當行則曰此體仁所不樂聞者也覆一疏則曰懼體仁之意別有所屬也建一議則曰恐犯體仁忌諱撻其兇鋒也凡此皆召變之尤輿情所共鬱者而言出禍隨誰敢爲陛下正告之傳曰小人之使爲國家災害並至雖有善者亦

無如之何矣願陛下三復斯言罷體仁以回天意若體仁罷而甘霖不降卽殺臣以正欺君之罪當是時帝方厚眷體仁貶紹杰一秩體仁猶力辨且許其別有指授紹杰乃上言近廷臣言事卽指及乘輿猶荷優容獨一字涉體仁必遭貶黜毋論往日卽自冬徂春當克鋒者幾人矣誰不愛功名而猥聽人指授耶因列其亂政實跡一不肯設立總督因庇兵部侍郎彭汝楠致失機宜一用貪穢私人胡鍾麟爲職方郎中遂黜李繼貞一囑尙書閔洪學起私人唐世濟爲南京總憲一錮正人瞿式耜等一庇姻婭沈棨以負罪道臣驟擢宣府巡撫致私款辱國輕擬充軍一庇主考丁進磨勘俱從寬典且曰臣所仰祝聖明洞燭體仁奸欺者其說不過兩端下惟

朋黨一語可以箝言官之口挑善類之禍上惟票擬一語可以激聖明之怒蓋憤悞之愆試觀今日災異盜賊誰執其咎將焉用彼相哉帝以挾私求勝切責之體仁再辨復以朋黨爲言紹杰旣奉旨降調復言體仁受銅商王誠金其長子儼受巡撫榮及兩淮巡鹽高欽順等金皆萬餘體仁又用門客王治每事居間酬以青浦王簿東南之利皆由治轉輸體仁私邸兩被盜失黃金寶玉無筭匿不敢言帝仍切責遂調爲上林苑署丞遷行人司副八年賊犯皇陵紹杰憤復劾體仁
懷國召寇帝怒再請應天府檢校屢遷南京吏部郎中卒福至時復故官

李世祺字壽生青浦人天啓二年進士授行人崇禎三年擢

刑科給事中陳大計之當定者二曰兵食之計民生之計大弊之當釐者三曰六曹之弊在吏胥邊吏之弊在欺隱貪墨之弊在奢靡夏旱帝禱雨未應疏列恤畿甸議催科預儲備三說進帝並納之帝遣中官監視諸鎮給事中宋可久馮元勳宋鳴梧吳南瀨常自裕御史姜思睿張應辰刑部主事杜麟徵交章諫帝皆不納世祺上言祖宗立法錢穀兵馬軍民各分事權所以防專擅今內臣入奉天顏出司兵食內廷意旨既得陰伺之外廷事權又得顯操之夫魏忠賢盜弄神器兵馬錢穀之地盡置私人將圖不軌非聖天子踐極害胡可言奈何躬自翦之又復蹈之也且今日之舉良史將書之後嗣將效之踵爲故事必貽社稷憂不納特進言者多獲譴帝

又日親細務任察爲明五年夏月世祺上言江海爲百谷王以其善下今諸臣言苟未當輒蒙詰責詰責不已貶黜隨之
言者前瞻後顧恐干嚴譴依阿得策樸直摧心折檻牽裾寧
可復見且君職要臣職詳天子一日萬幾神太運則疲精太
用則竭一言之謬一事之訛必待聖明摘發無乃主獨勞臣
獨逸乎聖人爲治使公孤百職環列任事人君但責其人又
侵其事課其效不紊其權恢彌天之網以覆之需歲月之
以安之天子清明無欲獨觀萬化之源則寧謐之理自致
必效後世察察之治哉帝不能用八月淫雨損山陵昌平

動世祺上言今宇內多故即使兩暘時若天地清寧猶有
禍患所底況警戒疊至乎臣未知陰陽請言人事今輔理者

調燮無聞而精神專爲結知固寵之用統均者衡才鮮術而中外無一緩急可用之人中樞決策大類掩耳盜鈴至計持籌未免醫瘡剜肉此所謂折鼎而覆餗者也州縣迫於功令鞭策不前六曹窘於簿書救過不贍簪筆執簡之臣接跡囹圄考槃邁軸之士抗聲鴻舉此所謂跼蹐而泮渙者也一人可議因而疑及衆人則嫫姆西施同在暗室一事可訾因而疑及衆事將伯夷盜跖俱成竊鉄此負塗載鬼之見也黃衣之使頡頏卿貳之堂貂蟬之座雄踞節鉞之上低眉則氣折強項則釁開此陰陽冰炭之漸也至各邊監視之遣已將期月初雖間有摘發究竟同歸模稜效與不效亦可槩見夫地水屬陰宜靜而動宜順而逆皆陰于陽之象也天心示警深

切著明伏願撤回各使以明陰不干陽之分然後採公論以
進退大臣酌事情以衡量小臣釋疑忌之根開功名之路庶
天變可回時艱可濟帝以借端瀆奏切責之給事中陳贊化
劾周延儒中有羲皇上人語謂聞之世禩帝責世禩回奏則
言聞之贊化帝詰責者三四世禩執如初乃已七年正月疏
劾大學士溫體仁吳宗達言體仁與舊輔延儒俱爲時論所
擯皇上排衆議用之推腹心任之可謂得君專行政久矣自
二人輔導以來封疆殘破盜賊充斥民生困瘁凡從來未有
之災害無所不有從來未有之弊政無所不行皇上厭薄延
儒人心稍快乃獨畱體仁使貽玷黃扉夫延儒僨轅敗犂之
新犢也體仁竊銜詭轡之老馬也彼之浮薄易見此之陰賊

難知皇上意其出口傾人似若不顧情面不知其爲人也遠
士類昵小人陳贊化所劾李元功吳之瑞等皆體仁私人轉
薦之延儒者也陰置檢邪潛通線索窺其戶若無往來問其
心實多谿壑誠絕世之奸而大貪之尤矣且屢次瀕死終不
萌首丘之念貽書囑子誓不生還此豈有馬革裹尸之誼無
非謂恩怨未酬忍死以爲所欲爲耳若宗達者淹淹四載寂
寂無聞仰鼻息於他人貪好官之自我真所謂危不持顛不
扶焉用彼相者也因并劾兵部尚書張鳳翼滿職狀帝怒貶
福建按察司檢校且追罪文選郎吳鳴虞考選非人亦貶三
秩御史龔廷獻論救不聽久之起行人司副屢遷太僕寺卿
遣祭魯王事竣旋里國變後杜門不出久之卒

詹爾選字思吉撫安人崇禎四年進士授太常博士八年擢御史時詔廷臣舉守令爾選言縣令多而難擇莫若精擇郡守郡守賢縣令自無不賢因請復用侍郎陳子壯推官湯開遠報聞明年疏劾陳啓新且責吏部尙書謝陞尸素忤旨切責大學士錢士升以爭李璉請括富戶疏帝責其沽名引罪乞休去爾選上疏曰近見輔臣職分看詳一疏致奉嚴綸及得李璉疏觀之而後知輔臣不忍不言之情且有不得不疾呼之勢俄而輔臣引咎求黜遽奉回籍之旨夫久臣所以不肯言者其源在不肯去耳今輔臣肯言肯去臣實榮之獨不能不爲朝廷惜此一舉也皇上謂輔臣心膂臣不當疑聖明之主然璉以非理非法事導皇上其端一開大亂將至輔臣

憂心如焚忽奉改擬之命遂爾執奏皇上方嘉許不暇顧以爲疑君要譽耶人臣無故疑其君非忠也乃謂吾君萬舉萬當者第容悅之借名必非忠人臣沽名義所不敢出也乃人主不以名譽鼓天下使其臣爭尸位保寵習成寡廉鮮恥之風亦必非國家利況今天下疑皇上者不少矣將驕卒惰尙方不靈億萬民命徒供武夫貪冒則或疑過於右武穿札與操觚並課非是者弗錄人見賣牛買馬紉德齊力徒使強寇混蹟於道途父兄莫必其子弟則或疑緩於敷文免覲之說行上意在甦民困也而或疑朝宗之大義不敵數萬路費之金錢駁問之事煩上意在懲奸頑也而或疑明啓之刑書能當幾沓加等之紛亂其君子憂驅策之無當其小人懼陷累

之多門明知一切苟且之政或拊心愧恨或對衆歎歎輔臣
不過偶因一事代天下發憤耳而竟鬱志以去恐後之大臣
無復有敢言者矣大臣不敢言而小臣愈難望其言矣所日
與皇上言者惟苛細刻薄不識大體之徒似忠似直如狂如
癡售則挺身招搖敗則潛形遁竄駭心志而燭耳目毀成法
而釀隱憂天下事尚忍言哉祈皇上以遠大宅心以簡靜率
憲責大臣弼違之義作言官敢諫之風寧獻可替否毋藉口
聖明獨斷掩聖主之謙冲寧進禮退義毋藉口君恩未酬飾
引身之濡滯臣愚不勝惓惓疏入帝震怒召見武英殿詰之
曰輔臣之去前旨甚明汝安得爲此言對曰皇上大開言路
輔臣乃以言去國恐後來大臣以言爲戒非皇上求言意帝

曰建言乃諫官事大臣何建言對曰大臣雖在格心然非言亦無由格大臣止言其大者決無不言之理大臣不言誰當言者帝曰朕如此焦勞天下尚疑朕乎卽尚方劍何嘗不賜彼不能用何言不靈對曰誠如聖諭但臣見督理有參疏未蒙皇上大處分與未賜何異帝曰書筭騎射非國初取士法乎如督撫討賊自須乘馬豈得御輿有司練鄉勇亦須習射何云強寇混蹟於道途對曰承平時有操弓挾矢者人得執而問之今若人人持弓矢則良否何從辨帝曰父兄教子弟騎射何不可乃云莫必其子弟對曰往時爲子弟者教以規矩準繩猶恐弗率倘責以馳馬試劍若何施約束帝曰刑官擬罪不合朕不當駁乎對曰若爾是刑官不職但當易其人

不當寢其事帝曰汝言一切苟且之政朕如此圖治何云
且對曰皇上所行乃救時權宜若揆以中正之道未免爲苟
且帝曰汝以何者爲苟且對曰加派帝曰加派因賊未平若
賊平何難停汝尚有言乎對曰搜括抽扣亦是帝曰此供軍
國之用非輸之內帑汝更何言對曰卽捐助亦是帝曰本令
願捐者聽何嘗強人時帝聲色俱厲廷臣在旁皆震懾而爾
還詞氣不撓帝又詰發憤諸語及帖黃簡略斥爲欺罔命錦
衣提下爾選叩頭曰臣死不足惜皇上幸聽臣事尚可爲卽
不聽亦可畱爲他日思帝愈怒罪且不測諸大臣力救乃命
繫於直廬明日下都察院議罪議止停俸帝以語涉誇詡并
罪視草御史張三謨令吏部同議請鐫五級以雜職用復不

許乃削籍歸自後言者屢薦皆不聽十五年給事中沈迅左
懋第相繼薦有詔召還未及赴而都城陷福王立首起故官
未上羣小用事憚爾選鯁直令補外僚遂不出國變後又十
二年而終

傅朝佑字右君臨川人幼有孝行嘗割股愈父疾萬曆中舉
鄉試第一師事鄒元標天啓二年成進士授中書舍人崇禎
三年考選給事中方需次值承平初復列上善後七事帝採
納之尋補授兵科明年八月疏劾首輔周延儒陰擅威福明
毒忠良以機械變詐之心運刑名督責之術見佞則加之膝
結袁弘助張道濬爲心腹遇賢則墜之淵擯錢象坤劉宗周
於草莽傾陷正士加之極刑曰上意不測也攘竊明旨播之

朝古曰吾意固然也陛下因旱求言而彼恐其揚已過故削
言官以立威陛下慎密兵機而彼用以箝人口故挫直臣以
休衆先年論其罪惡者今皆安在而親知鄉曲布列要津是
豈大臣之道耶忤旨切責及中官王坤詆延儒朝佑言坤未
嘗操彈劾權不宜侵閣臣而延儒當遣內臣之始舉朝力諫
不肯以去就爭皆有罪不納給事中章正宸莊鼇獻言事獲
譴抗疏救之屢遷工科左給事中疏陳當務十二事一納諫
二恤民三擇相四勿以內批用輔臣五勿使中官司彈劾六
勿令法外加濫刑七止緹騎八停內操九抑武臣驕玩十廣
起廢十一勅有司修城積粟十二講聖諭六條旋出封益藩
事竣還里九年卽家進刑科都給事中還朝愆期爲給事中

陳啓新所劾貶秩調外未行疏論溫體仁六大罪略言人君治天下之道曰明曰斷人臣相天下之道曰虛曰公數年以來彈劾首輔體仁者章滿公車而皇上曾不決去之體仁則非惟不去也凡有言者必多方斥逐如吳執御魏呈潤劉宗周吳家周黃紹杰王績燦李曰輔詹爾選胡江周鏞等不可殫述臣請先數其六罪而後及皇上之當明與斷可乎一曰得罪於天子陛下當邊警時特簡入閣望其匡扶社稷乃不正心誠意以聖賢之道事吾君而專務督責刻尚刑名窺陛下意在振作彼則借以快恩仇窺陛下治尚精明彼則託以張威福至陛下慎重用人屢推屢駁彼且揚言曰非我薦不用亦負恩極矣一曰得罪於祖宗鳳陽昌平皆毓靈之地體

仁秉國數年曾無綢繆之計致兩地失守生靈被殃何以塞天下口乎一曰得罪於天地燮理之事必責三公體仁入相以來日月交食星辰失行太白經天風霾數見且四方皆旱五穀不登地震河決城陷井枯而體仁乃日尋私情圖報睚眦安望其少知愧悔以這天誅也一曰得罪於封疆封疆之事在明功罪今強敵內逼大盜四起高麗且告陷矣體仁猶冒賞冒廕以致中外解體庶民有口何可掩也一曰得罪於聖賢國家以科目取士垂三百年體仁因其子爲復社諸生所斥募人糾彈牽連不已又議裁減入學額有漸罷科目之勢是焚書坑儒將見於今矣一曰得罪於身心天地生人各有良心聖賢垂訓無踰天理體仁陷文武臣僚數百幾滿獄

豈良心盡昧甘欺君罔上抑亦徇私害正習以成性也伏願
皇上下施乾斷速去體仁母以天變直不足畏母以人言直
不足恤母以體仁之督責逢迎爲必可任母以一己之精明
嚴密爲必可恃母以李汝璈之忠言爲逆耳母以許自表之
直糾爲沽名母以劉崇周易應昌等忠清執法之臣爲可廢
卹天下死難之忠節以鼓士氣復天下削奪之冠帶以收士
心體天下大小之臣僚以課實功聘天下道德之高賢以咨
治道大赦天下速更苛政省刑薄斂布德行仁庶倒懸可解
太平可致也帝怒除其名下吏按治踰月體仁亦罷中官杜
勳重朝佑令其上疏請罪而已從中主之可復故職朝佑不
應十一年冬國事益棘獲罪者滿國朝佑乃從獄中上疏

爲請寬恤語過激會有邊警未報也明年春責以顛倒賢奸
撓亂國是恣意訕侮命廷杖六十創重而卒福王時復故官
鼇獻字任公晉江人崇禎六年由庶吉士改兵科給事中其
冬上太平十二策中極論東廠之害忤旨貶浙江布政司照
磨福王時起故官久之卒汝璨字用章南昌人崇禎時爲刑
科給事中數有所論建十年閏四月久旱求言陳回天四要
論財用政事之弊請召劉宗周魏呈潤詹爾選李化龍等而
未首八九年來干和召災之事始於端揆積於四海無怪天
地災變叠出而未已觸帝怒令同素者再下獄按治削籍歸
京師陷衰絰北面哀號作祈死文卒福王時復官

虞勇字仁有安樂人天啓二年會試答策極言宦官之禍被

放又三年成進士同年生邀謁魏忠賢持不可授饒州推官謁鄒元標於吉水師事之中使至知府以下俱郊迎勇獨不往且捕笞其從人中使將愬之忠賢會敗獲免丁內外艱歷開封歸德二府推官流賊攻歸德乘城守擊敗之崇禎十年行取入京特變考選例優者得爲翰林公論首勇而吏部尚書田唯嘉爲任濬地抑勇及他寡援者二十三人爲部曹勇得南京吏部主事輿論大譁勇恬然不數日卽辭朝去明年二月帝御經筵問講官保舉考選得失諭德黃景昉訟勇及朱天麟屈講官羣和之帝親策諸臣天麟得翰林濬亦得御吏而勇以先赴南京不獲與尋用御史涂必泓言授南京御吏楊嗣昌奪情入閣黃道周何楷林蘭友劉同升趙士春言

之威獲譴勇憤其年九月上疏曰禮莫大於倫倫莫大於君親未有不知君親而可齒於人類者也況儼然秉國之鈞天子是毗者乎嗣昌謂古列國之君臣可得而避今一統之君臣無所逃於天地之間是三年之喪可行於古不可行於今也嗣昌所引者何代之經所遵者何國之典信如其言是凡爲臣者皆不當終三年喪終則爲後君爲不臣先聖之詩書可焚先王之典禮可廢不舉人類化爲禽獸不止畱一嗣昌而生天下不臣不子之心何如去一嗣昌而樹萬世爲臣爲子之鵠嗣昌豈以一身去畱係社稷安危耶秉樞兩年一籌莫展邊警頻告流寇披猖無問其經濟矣清議不畏名教不畏先聖之訓詞萬世之是非不畏無問其品望矣嗣昌去則

所全者大既盡子道亦完臣節不則既爲今日之賊子必爲他日之亂臣且既不知有父矣又執猶子之誼事程國祥以其爲父同年讓行讓坐何薄於親而厚於親之友耶疏入帝大怒命削籍提訊刑官擬杖徒不許嗣昌疏救亦不納乃擬遣戍命詰王使姓名勇獄申上書言臣十二年外吏數十日南臺無權可招無賄可納不知有黨帝怒切責竟戍寧波衛中外薦者十餘疏皆不召最後用劉宗周張瑋言命吏部覆議久之執政合詞請擢用命刑部核奏請復故官帝以勇宥罪方新不當復職命以他官用甫聞命而京師陷福王時起御史不赴後披緇爲僧越十五年而終

明史藁

列傳第一百四十三終

明史彙

列傳第一百四十四

光祿大夫

經筵講官明史總裁戶部尚書加叅議王鴻緒奉

敕編撰

馬世龍

尤世威

侯世祿

李 卑

祖 寬

張任學

沈有容

張可大

賀虎臣

秦良玉

弟民屏

龍在田

馬世龍字蒼元寧夏人由世職舉武會試歷宣府遊擊貌魁梧多膂力天啓二年孫承宗署兵部有薦其才者超授永平副總兵使過關陞見承宗與語奇之薦授署都督僉事充三屯營總兵官及承宗出鎮令山海總兵江應詔定軍制應詔

先受尚方劍權尊駭不任事承宗薦世龍代之俾領中部調
總兵王世欽尤世祿分領南北二部明年正月以世龍權輕
請賜尚方劍實授府銜且極言文臣監制之害帝可之承宗
乃築壇拜世龍大將代行授鉞禮軍馬錢穀悉屬之尋定分
地世龍居中駐衛城世欽南海世祿北山並受世龍節制兵
各萬五千人世龍感承宗知頗盡力承宗令茅元儀造戰車
獨世龍解其意出已貲盡改舊車爲偏廂與承宗定計出守
關外諸城規模漸定四年巡撫喻安性偕世龍及袁崇煥東
巡廣寧世龍又與崇煥世欽航海抵蓋套相度形勢而還五
防叙勞加右都督當是時承宗統士馬十餘萬用將校數百
人歲費軍儲數百萬諸有求於承宗者率因世龍不得則大

怨而世龍貌偉中實怯忌承宗者多擊世龍以撼之承宗抗辯於朝曰人謂其貪淫朕削臣敢以百口保其必無帝以承宗故不問至五年九月世龍部將敗沒於耀州鹽場攻者益衆耀州在三岔河南有降人劉伯濕者來言城內虛可襲取也且難民數萬日夜望官軍至世龍信之遣前鋒副將魯之甲參將李承先率師往檄水軍游擊金冠以舟濟師冠違令不至師次柳河得六漁艇以濟三日濟八百騎營泥淖中

大清守將出擊殺二將騎皆不返言官交章劾嚴旨切責令戴罪圖功魏忠賢方以清君側疑承宗其黨攻世龍者因并及承宗承宗不安其位而去以兵部尚書高第來代職方主事徐日久者先佐第撓遼事及從第贊畫力攻世龍世龍已

陰結忠賢反削日久籍其冬世龍亦謝病去崇禎元年王在晉爲尚書世龍上疏極論其罪有詔逮世龍久不至在晉罷始詣獄二年冬都城戒嚴刑部尚書喬允升薦世龍才詔圖功自贖無何祖大壽師潰京師大震承宗再起督師以便宜遣世龍撫諭馳至關大壽果聽命及滿桂戰死遂令世龍代爲總理賜尚方劍盡統諸鎮援軍三年正月四日

大清兵拔永平八日拔遷安灤州及先所拔遵化皆兵守之而分兵攻山海關世龍集諸將議曰敵方專力於東大壽與相持我輕兵襲遵化進師三屯與大壽尅期會戰使首尾不相顧庶諸城可復副將官惟賢遊擊張奇化等八人慨然請行兵爰惟賢奇化皆敗死餘衆退保石門臺頭間頃之

大清兵攻馬蘭谷守將金日觀告急世龍遣參將王世選等
援之城獲全二月世龍偵

大清兵將南下發遊擊曹文詔等扼玉田初八日遇洪橋力
戰

大清兵乃還三月世龍督文詔等戰大塹山轉鬪三十餘里
漸近遵化城中出兵援乃引退錄先後功進左都督時四城
失守已三月承宗大壽隔關門與世龍諸軍聲息斷帝急召
四方兵勤王昌平尤世威薊鎮楊肇基保定曹鳴雷山海宋
偉山西王國樑固原楊麒延綏吳自勉臨洮王承恩寧夏尤
世祿甘肅楊嘉謨所將皆諸邊銳卒內地則山東河南南都
湖廣浙江江西福建四川諸軍亦先後至並壁薊門觀望不

進給事中張第元上言世龍在關數載績效無聞非若衛霍之儔功名足以服人也諸帥宿將非世龍偏裨欲驅策節制誰能甘之師老財匱銳氣日銷延及夏秋將有不可言者帝以世龍方規進取不納其言時

大清兵所下城邑無意堅守大壽於五月十日薄灤州明日世龍等以師會又明日復其城十三日遊擊斬國臣復遷安我

大清守永平者亦旋師明日副將何可綱遂入永平又二日別將復遵化閱五月四城始復論功大壽最世祿次之世龍加太子少保廕本衛世千戶是年八月復謝病歸六年五月插漢虎墩兔合套寇犯寧夏總兵賀虎臣戰歿詔起世龍代

之世龍生長寧夏習其形勢爲大修戰備明年正月二部人
犯遣參將卜應第邀擊大破之斬首二百有奇踰月套寇犯
賀蘭山世龍遣降丁潛入其營馘其長撒兒甲斬級如前世
龍多收套衆巡按御史范復粹疑之言於朝有詔詰責世龍
言臣收降正以疑插部也所收三百五十人先後殺敵甚夥
其形跡已攜不足爲慮帝許之未幾插部大舉入犯世龍遣
副將婁光先等分五道伏要害而已中道待之夾擊斬首八
百有奇巡撫王振奇亦斬三百餘級寇復犯河西玉泉宮世
龍復邀斬五百餘其年七月犯棗園堡世龍又大敗之俘斬
一千有奇軍令斬首百二十級爲大捷告廟稱賀世龍半歲
中屢奏捷威名震西塞然是時插套二部勢弱故世龍易以

見功也無何卒於官年止四十餘後論功贈太子太傅世錦
衣僉事賜恤如制

尤世威榆林衛人與兄世功弟世祿並勇敢知名天啓中世
威積官建昌營參將調守牆子路七年遷山海中部副總兵
寧遠告警從大帥滿桂赴援力戰城東有功增秩受賜崇禎
二年擢總兵官鎮守居庸昌平其冬京師戒嚴命提兵五千
防順義俄命還鎮防護諸陵四年十二月代宋偉爲山海總
兵官積資至左都督七年我

大清兵入宣府命偕寧遠總兵官吳襄馳援總督張宗衡與
議進兵方畧襄厲聲曰我軍止外貌可觀耳一交鋒悔何及
二將遂擁兵不進事平爲兵科常自裕等所劾並褫職論戍

未行會流賊躡河南詔世威充爲事官與副將張外嘉分統關門鐵騎五千往勦明年正月賊陷鳳陽世威以二千五百騎赴之抵亳州會總督洪承疇出關討賊次信陽命世威趨汝州甫二日承疇亦至時賊見河南兵盛悉奔入關中承疇將入關征討乃大會諸將令分防汝雒諸要害以世威所將皆勁旅令與參將徐來朝分駐永寧盧氏山中以扼雒南蘭章川朱陽關之險戒之曰靈陝賊所出入汝勿懈及承疇旣入關賊避之而南復由藍田將走盧氏扼於世威仍入商雒山中來朝所部三千人不肯入山大譟雖撫定軍心遂不固後賊至來朝逃一軍盡亡世威軍暴露久大疫與賊戰失利世威及遊擊劉肇基羅岱俱負重傷衆大潰賊遂越盧氏走

承寧事聞命解任候勘十年宣大總督盧象昇言世威善撫士驍軍機徒以數千客旅久戍荒山水土失調疾疫大作遂致失利今當用兵時棄之可惜乃命赴象昇軍自效及象昇戰歿自免歸十五年以廷臣薦命與弟世祿赴京候調比至召對中左門復告歸明年十月李自成陷西安傳檄榆林招降總兵官王定懼率所部精卒棄城走時巡撫張鳳翼未至城中士馬單弱人心洶洶布政都任亟集副將惠顯參將劉廷傑等議城守世威與里居諸帥王世欽世國侯世祿拱極王學書李昌齡輩咸與焉昌齡故延綏總兵寓居榆林者衆推世威爲主帥分陴固守無何賊十萬衆陷延安下綏德復遣使說降廷傑大呼曰長安雖陷三邊如故賊皆中州子弟

殺其父兄而驅之戰必非所願榆林天下勁兵一戰奪其氣
然後約寧夏固原爲三師迭進賊可平也衆曰將軍議是世
威奮曰受國厚恩敢忘報稱諸公旣見推指麾三軍惟老夫
是任世欽前曰我輩世叨國恩豈爲賊下礪兵秣馬予請一
戰於是都任令於軍曰壯士一聽尤將軍違者殺無赦乃歛
血誓師簡卒乘繕甲仗各出私財佐軍守具未備賊已抵城
下出戰敗之廷傑募死士乞師套部其衆將至賊分兵拒却
之攻城益力官軍力拒賊死無算益衆來攻守七晝夜賊乃
穴城置大礮轟之城遂破世威等猶督衆巷戰婦人豎子亦
發屋瓦擊賊賊屍相枕藉旣而力不支任死之侯世祿父子
及學書俱不屈死世威世欽世國昌齡並被執賊怒廷傑勾

套部磔之至死罵不絕口顯亦被執大罵賊賊惜其勇繫至神木服毒死縛世威等獻自成自成坐秦王府欲降之四人不屈膝自成曰諸公皆名將助我平天下取封侯可乎衆罵曰汝驛卒敢大言侮我自成笑前解其縛世欽唾曰驛卒毋近前汗將軍衣自成怒皆殺之世欽大將威子官都督僉事與蕭如薰白兆慶分練三大營軍遷都督同知孫承宗設山海三大將用爲左部總兵官言官欲去承宗先擊世欽遂謝病去崇禎八年洪承疇起之家擊李自成有功卽謝歸十六年召對中左門未及用而歸遂死於賊世國威弟保定總兵官繼子由柳溝總兵官罷歸甫數日竟拒賊以死世威從弟翟文爲靖邊營副將嘗從洪承疇追闖王於鳳翔之官亭大

敗之斬首七百餘級至是率敢死士出南門奮擊殺傷過當
中矢死又有尤岱者由部卒起家至山海鐵騎營參將數有
功忤上官棄職歸守水西門城陷自殺廷傑旣死其父副使
彝鼎聞之不哭曰吾有子矣其弟廷夔收兄屍亦自投閣死
一時同死者督餉戶部員外郎王家祿自剄死里居戶部主
事張雲鶚不屈死指揮崔重觀自焚死傅佑與妻杜氏自縊
死中軍劉光祐罵賊死材官李耀善射矢盡自刎死同營李
光裕趣家人死亦自刎死張天叙焚其積貯自縊死指揮黃
廷政與弟千戶廷弼奮力殺賊同死千戶賀世魁
偕妻柳氏自縊死參將馬鳴節聚妻子室中自焚死里居戰
死則山海副總兵楊明定邊副總兵張發孤山副總兵王永

祚西安參將李應孝在官死事則遊擊傅德潘國臣李國奇
晏維新陳二典劉芳馨文侯國中軍楊正鞞柳永年旗鼓文
經國守備尤勉惠漸賀大雷楊以偉指揮李文焜文燦而副
將常懷李登龍遊擊孫貴尤養鯤守備白慎衡李宗叙亦以
守鄉土遭難諸生則陳義昌沈濬沈演白拱極白含章罵賊
死張連元連捷李可柱胡一奎李蔭祥自經死一城之中婦
女死義者數千人井中屍滿賊遂屠其城榆林爲天下雄鎮
兵最精將材最多然其地最瘠餉又最乏士常不宿飽乃慕
義殉忠志不少挫無一屈身賊庭其忠烈又爲天下最事聞
天子嗟悼將大行褒恤以國亡不果

侯世祿榆林人由世職累官涼州副總兵遺事亟詔擢總兵

官提兵赴援世祿於諸將中稱精悍爲經畧熊廷弼所知及
袁應泰代廷弼亦倚任之天啓元年應泰將復撫順清河議
用大將十人以世祿及姜弼梁仲善各將兵一萬主清河未
行而我

大清兵拔瀋陽逼遼陽世祿弼仲善與李秉誠朱萬良屯兵
演武場力戰仲善陣亡萬良敗奔爲叢矢所中死弼戰尤力
與世祿俱負重傷潰圍得出秉誠亦敗還遼陽遂破已而論
罪世祿以傷重命立功自効尋用爲固原總兵官六年以軍
政拾遺罷明年寧錦告警有薦其才者命率家丁赴關聽調
旋命出守前屯甫至令以故官鎮山海崇禎元年移鎮宣府
明年冬率師入衛與

大清兵遇於順義潰再遇德勝門復潰世祿被創部卒剽民
間奔還鎮事聞當重坐以傷重命戴罪立功已而被劾法司
當大辟以勤王先至減死戍邊巡撫郭之琮亦削籍九年八
月京師被兵率子弟從軍叙功免戍還籍廷臣多推薦迄不
復用及賊兵臨城與子拱極固守新添門城陷父子見執俱
不屈死拱極歷官參將常從總兵尤世祿破賊河曲有功九
年冬任山海總兵官十二年正月我

大清兵入畿輔拱極率精騎二千躡至邯鄲遇伏敗負重傷
尋謝病去十六年詔舉將才廷臣多推拱極既入都與王洪
王世欽尤世威召對中左門旋遣還卒與父同死

李卑字侍平榆林人初爲神木千總以功擢守備天啓初總

王象乾設薊鐘車營五以卑爲都司命書統西協後車營
遷山海關遊擊坐事罷歸崇禎二年陝西巡撫劉廣生議討
延慶回賊三道進兵命卑偕遊擊伍維籓等自西入合勦幾
盡卑簡精騎二百追奔兩晝夜行四百里抵保安寧塞連破
之共獲首功一千有奇旋起延安參將是時羣盜大起延安
爲其卑連敗之富家灣松樹屯四年神一元陷保安卑與寧
夏總兵賀虎臣守延安賊不敢犯尋擢孤山副總兵譚雄犯
安塞知縣柴國弼固守積勞死城陷賊縱掠去已復入據其
城卑與王承恩擊降雄戮之斬首五百三十餘級混天猴旣
殺參政張允登五年春陷宜君鄜州其夏攻合水卑及參將
馬科追至甘泉山七月及之延水關斬首六百二十餘級其

地東限黃河賊溺死者無算科部卒斬混天猴以獻初卑及遊擊吳國俊等斬賊魁三人於甘泉橋子溝及曹操突破宜川卑馳至操走尋勦賊固原斬其魁薛仁貴等三人時陝西賊多流入山西詔卑及賀人龍各率部卒千隸總督張宗衡麾下會王自用陷遼州聞官兵至棄城去六年春諸軍入城多殺良民冒功卑獨嚴戢其下無所擾已敗賊陽城之郎家山又與艾萬年連敗之南獨泉土河村復敗之茨樞村賊入濟源山中巡撫許鼎臣檄卑萬年擊卑破之天井關七月臨洮總兵曹文詔改大同命卑代署其事協討河北賊加都督僉事數有功其冬賊盡走河南卽命卑援勦七年春敗賊內鄉馳至光化與楚兵敗賊蓮花坪白溝坪實授臨洮總兵官

高賊湖廣賊多聚卽襄廬象昇方倚卑辦賊六月卒於官卑
善持紀律所至軍民安堵爲人有器度當倉猝鎮靜如常贈
右都督賜祭葬

祖寬遼東人少給事祖大壽家從軍有功累官寧遠參將勇
敢善戰部卒多塞外降人所向克捷崇禎五年七月叛將李
九成等圍萊州急詔發關外兵討之寬與靳國臣祖大弼張
韜率兵抵昌邑巡撫朱大典獲賊書約寬等爲內應以示寬
等皆誓滅賊以自明乃用寬國臣爲前鋒至沙河寬五百騎
遇賊兵三千引却會國臣至拔刀大呼直前寬大弼韜咸殊
死戰大敗賊兵逐北抵城下立解萊州圍韜降丁原名海參
代最驍勇國臣善規陣嘗曰塞上交兵茶頃勝負已分一切

古法無所用是月晦進兵黃縣賊傾巢出戰寬等復大敗之遂與劉澤清等築長圍以困登州明年二月賊始平語詳大典傳寬以解圍功進都督僉事再叙功世應外衛副千戶進副總兵八年秋命爲援勦總兵官督關外兵三千討流賊十月至河南巡撫陳必謙監紀推官湯開遠令與左良玉抵靈寶至則挫張獻忠於焦村無何高迎祥李自成至與獻忠合攻閩鄉寬赴救賊解而趨靈寶斷良玉寬等不相應遂東陷陝州攻洛陽良玉寬至迎祥自成獻忠皆走良玉追迎祥而寬分擊獻忠夜督副將祖克勇等趨葛家莊黎明遇賊先登整齊王軍大潰奔嵩縣九臯山寬伏二軍於山溝以誘之賊趨下伏發斬馘九百有奇尋與副將劉肇基羅岱遇賊汝州

圯料鎮復大敗賊伏屍二十餘里斬馘千六百有奇獻忠憤
合迎祥自成兵與寬戰龍門白沙截官軍爲二寬自斷後士
卒殊死鬪自晨迄夜分復大捷斬馘一千有奇迎祥自成乃
走窺光州寬督副將李輔明躡賊後與副使戴東旻合於信
陽賊走攻確山寬等馳救大破之斬馘五百八十有奇自成
等遂東走廬州攻圍七晝夜明年正月寬等至賊奔全椒遂
圍滁州南京太僕卿李覺斯知州劉大鞏禦之賊死無算乃
裸淫村婦女數百斷其頭露下私爲厭勝術城上發砲輒炸
或暗不鳴覺斯等取圓牖外嚮砲乃可用賊計窮空營出掠
而寬等諸軍至寬大呼諸軍無不一當百自晨至晡賊大敗
從城東五里追至關山之朱龍橋橫屍枕籍水爲不流時總

理盧象昇親督戰謂所殺多良民恹歎寬大愠牽象昇衣請往驗象昇謝乃已二月又從象昇破賊七頂山殲自成精卒殆盡象昇遂移軍南陽命寬備鄧州會賊渡漢江人郎襄餘衆三萬匿內鄉浙川山中象昇命寬與祖大樂等入山搜討邊軍慙勇飲食嗜欲異他卒不可繩以法往時官軍多關中人與賊鄉里臨陣相勞苦拋生口棄輜重卽縱之去謂之打活仗邊軍不通言語逢賊卽殺故多勝然所過焚廬舍淫婦女恃功不戢又利野戰憚搜山且見賊遠竄非旬朔可定自以爲客將無持久心寬卒方過河譟而逸象昇激勸再三始聽命至黨子曰仍按甲不動而總兵李重鎮素恇怯冀卸責衆益思歸象昇乃力陳入山搜勦之難請令寬重鎮赴關中

討賊會總督洪承疇亦請之寬等遂移軍陝西隸承疇麾下
八月京師被兵召入衛錄滁州功進右都督賚銀幣事定詔
赴寧遠協守十一年冬

大清兵入畿輔詔寬率師援及山東告急寬逗遛明年正月
濟南失守褫職被逮坐失陷藩封棄市寬敢戰有功稱良將
性剛使氣不爲吏吏所喜卒致大辟莫爲論救帝在位總兵
官被戮者十有四人元年大同渠家楨三年薊鎮張士顯山
西張鴻功十年薊鎮李國梁十二年薊鎮吳國俊陳國威李
重鎮山東倪寵及寬十四年河南王紹禹十五年大同王樸
保定楊德政陝西賀人龍十六年薊鎮薛敏忠諸人多麗死
法獨寬之死人頗謂失刑云

張任學安岳人天啓五年進士授太原知縣以才調榆次崇禎四年舉治行卓異入爲御史陳蜀中私稅催科訟獄三大苦帝爲飭行出視兩浙鹽法數條奏利弊八年流賊陷鳳陽巡按吳振纓被逮簡才望御史代之遂命任學往還朝復按河南監軍討賊時羣盜縱橫而諸將縮朒不敢擊任學慨然曰事不辭難臣職也賊勢如此我輩雍容坐鎮耶十一年二月遂上疏極詆諸將請易武階親執干戈爲國平賊帝壯之下吏兵二部及都察院議諸臣以文吏無改武職者請仍以監軍御史兼總兵事帝不從命授署都督僉事爲河南總兵官河南舊無總兵左良玉陳永福並以客兵備援勦至是大將特設而麾下無一官兵部乃以署鎮許定國兵授之使參

將羅岱爲中軍岱健將屢著戰功任學倚以自強時熊文燦專主撫劉國能張獻忠俱降羅汝才馬進忠李萬慶等闖中原如故河南人據塢壁自保者數十賊悉摧破之踞息縣光州磔人投汝水水爲赤任學不能大創也進忠勢衰佯求撫文燦及巡撫常道立許之乘間逸去事聞任學與文燦道立並醵秩七月任學督岱等赴羅山合左良玉軍擊汝才萬慶及紫微星順義王大敗之追奔五十里斬首一千四百有奇獲黑虎狼滿天星賊奔遂平九月進忠寇開封至瓦子坡岱奮擊賊盡棄輜重遁入大隗山獲其妻子其冬京師戒嚴任學入衛道謁文燦言獻忠狼子野心終爲國患我以勤王爲名出其不意可立縛也文燦不能用抵畿南有詔却還巡撫

道立調良玉兵於陝州賊乘盧氏虛遁入內鄉浙川爲文燦所劾明年除道立名任學亦鐫一秩遊擊宋懷智都司孔道興再破賊陳州部將王應龍尤之龍等破賊襄城五戰皆勝副將岱與應龍懷智等復破賊葉縣十日奏入捷帝詔所司核實已又挫賊裕州而是時總兵孫應元黃得功統京軍討賊屢奏大捷凱旋錄功任學亦叙復二秩尋與左良玉陳洪範蹙李萬慶於內鄉萬慶方降獻忠已叛文燦盡調河南軍援勦獨任學留汝南川貴總督李若星論文燦主撫之謬請復任學原官攝行大將督察軍事不從七月獻忠合汝才自房縣西走岱偕良玉追之良玉令岱爲前鋒已隨其後至羅猴山軍乏食賊伏兵要害岱與副將劉元捷鼓勇直上伏四

起岱馬足絳於藤抽刀斷之蹶而復進乃棄馬步鬪久之矢盡陷於賊良玉軍亦大敗事聞任學坐褫職十五年言官請起廢任學與焉未及用而卒

沈有容字士弘宣城人僉事寵之孫也幼走馬擊劍好兵器舉萬曆七年武鄉試謁薊遼總督梁夢龍用爲昌平千總以才受知總督張佳胤調薊鎮東路轄南兵後營十二年秋朶顏長昂以三千騎犯劉家口有容夜半率健卒二十九人迎擊身中二矢卒死七人寇亦退斬首六級而還由是知名遼東巡撫顧養謙召麾下俾練火器十四年從李成梁出塞抵可可毋林斬馘多明年再出亦有功成梁攻北關有容陷陣馬再易再斃卒拔其城錄功世廕千戶遷都司僉書守浮屠

谷從宋應昌援朝鮮乞歸日本封事壞福建巡撫金學曾欲用奇搗其穴起有容守浯嶼銅山二十九年倭掠諸寨有容擊敗之踰月與銅山把總張萬紀敗倭彭山洋倭據東番有容守石湖謀盡殲之以二十一舟出海多沒於風過澎湖存十四舟與倭遇格殺數人縱火沉其六舟斬首十五級奪還男婦三百七十餘人倭遂去東番海上息肩者十年捷聞文武將吏悉叙功有容賚白金而已西洋有紅毛番者名和蘭國克悍善戰三十二年七月其長韋麻郎駕三大艘至澎湖求互市稅使高宋召之也有容白當事自請往諭見麻郎諭說蠶起麻郎呼宋使者索還所賂宋金揚帆去改僉書浙江都司由浙江游擊調天津遷溫處參將罷歸四十四年福建

中倭巡撫黃承元請特設水師起有容統之襲禽倭東沙尋
招降巨寇袁進李忠散遣其衆泰昌元年遼瀋相繼覆熊廷弼建
副總兵駐登州以命有容天啓改元遼瀋相繼覆熊廷弼建
三方布置之議以陶朗先巡撫登萊而擢有容中軍都督僉
事充總兵官登萊遂爲重鎮八月毛文龍有鎮江之捷詔有
容統水師萬偕天津水師直抵鎮江策應有容歎曰率一旅
之師當方張之敵吾知其不克濟也無何鎮江果失水師遂
不進明年廣寧覆遼民走避諸島日望登師採撿朗先下令
敢渡一人者斬有容爭之立命數十艘往獲濟者數萬人時
金復益三衛俱空無人有欲據守金州者有容言金州孤懸
海外登州皮島俱遠隔大洋聲援不及不可守迨文龍取金

州未幾復失四年有容以年老乞骸骨歸卒贈都督同知賜祭葬

張可大字觀甫應天人世襲南京羽林左衛千戶舉萬曆二十九年武進士授建昌守備遷浙江都司僉書分守瓜洲儀真捕江洋盜每發輒得稅監魯保死淮撫李三才令可大錄其貲却保家重賄同事者敗可大獨獲薦葉向高赴召大異之曰此不特良將且良吏也遷劉河遊擊改廣東高肇參將調浙江舟山奉命征黎與總兵王鳴鶴用黑番爲導搗其巢黎乃滅舟山居大海中元時建昌國州爲浙東要害可大修軍政自岑港抵歷江三江皆置戍倭犯五罩湖白沙港茶山潭頭連敗之加副總兵城久圯可大與副使蔡獻臣築之兩

月訖工城內外田數千畝海潮日害稼可大築碶蓄淡水遂
爲膏腴居民名之曰張公碶天啓元年以都指揮使掌南京
錦衣衛有歐陽暉者素強項由刑部主事謫本衛知事嘗賦
詩有陰霾國事非句揚州知府劉鐸書之扇以贈一僧惡鐸
者譖之魏忠賢暉鐸俱被逮可大爲約束旂尉捐俸助之卜
室處其妻子暉後獲雪搏頴以謝六年擢都督僉事僉書南
京右府崇禎元年出爲登萊總兵官會有裁登萊撫鎮議當
事惜其才命以總兵官視登州副總兵事而巡撫遂罷不設
二年春毛文龍忽擁衆至登州聲言索餉可大單舸往迎責
以大義文龍乃返及袁崇煥戮文龍其部下洶洶可大嚴備
迄無敢渡海者白蓮賊旣滅餘黨流劫招遠棲霞圍萊陽可

大擊破之獲其僞國公二人圍遂解京師被兵可大入衛命
守西直廣寧諸門明年二月加都督同知時京東城郭多失
守可大方與諸帥圖恢復會劉興治反東江遂奉詔還鎮已
而四城並復朝議復設登萊巡撫以孫元化爲之元化率關
外八千人至強半皆遼人可大慮有變屢言於元化不聽四
年七月錄前守城功進右都督十月僉書南京左府兼督池
河浦口二軍登人相率留之未去而孔有德反吳橋東陷六
城可大急往勦元化檄止之不聽次萊州遇元化復爲所阻
乃還鎮歲將晏賊兵暮薄城可大請擊之元化持撫議不許
可大陳利害甚切元化意稍回期明歲元日發兵合擊至期
元化兵不發明日合兵戰城東可大兵屢勝元化部卒皆濇

人與賊親故無鬪志其將張燾先走可大兵亦敗中軍管維
城遊擊陳良謨等陣亡燾兵半降賊賊遣歸爲內應元化開
門納之可大諫不聽夜中賊至城遂陷可大時守水城還家
叩首母前令部將殺其婢妾遂投繯死事聞贈特進榮祿大
夫太子少傅謚莊節賜祭葬予世廕建祠曰旌忠可大好學
能詩敦節行有儒將風弟可仕字文時以字行隱居博學嘗
輯明世布衣詩一百卷

賀虎臣保定人天啓中歷天津海防遊擊登萊參將移兗州
六年遷延綏副總兵河套寇大舉入犯從帥楊肇基協擊大
破之加署都督僉事崇禎二年階州卒周大旺等作亂捕誅
之尋擢總兵官鎮守寧夏關中賊大起王嘉胤陷清水營殺

遊擊李顯宗遂陷府谷其黨李老柴應之嘯聚三千餘人攻合水總督楊鶴檄虎臣往討遇於盤谷俘馘六百有奇已擊斬慶陽賊渠劉六四年神一元陷保安延安告急延綏撫鎮皆東援陝西巡撫練國事亟檄虎臣及副將李卑援虎臣等遂進圍保安已而杜文煥至謂城旦暮下散遣他將兵賊遂引河套數千騎敗虎臣軍會張應昌擊敗賊衆始棄城去虎臣借文煥等先後獲首功一千九百兵威甚振明年可天飛郝臨庵劉道江李都司再圍合水虎臣借臨洮曹文詔甘肅楊嘉謨固原楊麒合擊大破賊甘泉之虎兕凹斬首七百有奇賊大困六年五月插漢虎墩兔合套寇五萬騎自清水橫城分道入守備姚之夔等不能禦沙井驛副將史開先臨河

堡參將張問政岳家樓守備趙訪皆潰逃寇遂進薄靈州虎
臣急率千騎入守旋盡勒城中兵出擊次大沙井寇從漢伯
堡突至官軍未及布陳且眾寡不敵遂戰死子讚挾五十騎
突重圍出土卒死者三千三百餘人傷者七百人十餘人事
聞巡撫耿好仁逮問遣戍贈虎臣都督僉事賜祭葬世廕指
揮僉事尋錄先後勦寇功再贈都督同知世廕錦衣副千戶
好仁亦免戍讚勇敢有父風旣承廕尋舉武進士積官至京
管副將崇禎十七年三月李自成薄京師京軍六大營分列
城外皆不敢戰或棄甲降讚獨率所部迎擊爲賊射死弟誠
身長七尺美鬚髯爲諸生以忠義自許兄誠襲副千戶早卒
無子誠當襲以讓其弟詮及賊陷保定家人勸易衣遁叱曰

吾忠臣子偷生而逃何以見先將軍地下遂偕妻女投井死
秦良玉忠州人嫁石砮宣撫使馬千乘萬曆二十七年大征
播州千乘以三千人從良玉別統精卒五百裹糧自隨與副
將周國柱拒賊鄧坎明年正月二日賊乘官軍宴夜襲良玉
夫婦首擊敗之追入賊境連破金筑等七寨已偕酉陽諸軍
直取桑木關大敗賊衆爲南川路戰功第一賊平良玉不言
功千乘母覃氏與楊應龍私愛少子千駟命爲應龍贅婿至
是并殲焉其後千乘爲部民所訟瘦死雲陽獄良玉代領其
職良玉爲人饒膽智善騎射兼通詞翰儀度嫺雅而馭下嚴
峻每行軍發令戎伍肅然所部號白桿兵夙爲遠近所憚秦
昌時徵其兵援遼先遣兄邦屏弟民屏以數千人往朝命賜

良玉三品服授邦屏都司僉書民屏守備夫曆元年邦屏渡
渾河戰死民屏突圍出良玉自統精卒三千赴之所過秋毫
無犯至通州偶與浙兵角當事論之卽止詔加二品服卽予
封誥子祥麟授指揮使良玉陳邦屏死狀請優恤因言臣自
征播以來所建之功不滿讒妒口貝錦高張忠誠孰表帝優
詔報之兵部尚書張鶴鳴言渾河血戰首功數千實石砧西
陽二土司功邦屏旣歿良玉卽遣使入都製冬衣一千五百
分給殘卒而身督精兵三千抵榆關上急公家難下復私門
仇氣甚壯宜錄邦屏子進民屏官乃贈邦屏都督僉事錫世
廕與陳策等合祠民屏進都司僉書部議再徵兵二千良玉
與民屏馳還抵家甫一日而奢崇明黨樊龍反重慶齋金帛

結援良玉怒斬其使卽發兵率民屏及邦屏子翼明拱明溯流西上度渝城奄至重慶南坪關扼賊歸路伏兵襲兩河焚其舟以忠州爲民屏守地分兵護之馳檄夔州令亟防瞿塘上下賊出戰敗歸良玉言狀擢民屏參將翼明拱明守備已而良玉少挫餉不繼引還陳指揮者祥麟婦翁留屯酆都肆剽掠遠近訛言良玉亦反會奢崇明圍成都急良玉奉巡撫朱燮元檄復出軍賊噉諸土司厚利諸土司若平茶邑梅皆逗遛獨良玉鼓行而西收新都長驅抵成都賊遂解圍去良玉乃還軍攻二郎關民屏先登已克佛圖關復重慶良玉初舉兵卽以疏聞命封夫人錫誥命至是復授都督僉事充總兵官命祥麟爲宣慰使民屏進副總兵翼明拱明進參將良

玉益感奮先後攻克紅崖墩觀音寺青山墩諸大巢蜀中卒
底定復以援貴州功數資金幣三年六月良玉上言臣率翼
明拱明提兵裹糧累奏紅崖墩諸捷乃行聞諸將未睹賊面
攘臂誇張及乎對壘聞風先遁敗於賊者惟恐人之勝怯於
賊者惟恐人之強如總兵李維新渡河一戰敗衄歸營反閉
門拒臣不容一見以六尺軀鬚眉男子忌一巾幗婦人靜夜
思之亦當愧死帝優詔報之命文武大吏皆以禮待不得疑
忌是年民屏從巡撫王三善抵陸廣兵敗先遁其冬從戰大
方屢捷明年正月退師賊來襲戰死二子佐明祚明得脫皆
重傷良玉請卹贈都督同知立祠賜祭官二子而是時翼明
拱明皆進官至副總兵崇禎三年永平四城失守良玉與翼

明奉詔勤王出家財濟餉莊烈帝優詔褒美召見平臺賜良玉綵幣羊酒賦四詩旌其功會四城已復乃命良玉歸而翼明駐近畿明年築大凌河城翼明將萬人出護城成部議撤兵乃遣還鎮七年流賊陷河南加翼明總兵官督軍赴討明年鄧玘死以其所部皆蜀人命翼明將之連破賊於青崖河吳家堰袁家坪扼賊走郟西路然翼明性恇怯部將連敗不以實聞革都督銜貶二秩辦賊已從盧象昇逐賊穀城賊走均州翼明敗之青石鋪賊入山自保翼明攻破之連破賊界山三道河花園溝禽黑煞神飛山虎會賊出沒郟襄間撫治鄭陽苗胙土爲賊張胖子所給遣使招之翼明贊其事而賊卒不降翼明胙土皆被劾已而賊犯襄陽翼明連戰得利屯

兵廟灘以扼漢江之淺而羅汝才劉國能自深水以渡帝以
鄖襄屬邑盡殘罷胙土切責翼明賊遂大擾斷黃翼明辦賊
二年雖屢克捷賊勢如故被劾解官而良玉自京師還不復
命援勦專辦蜀賊七年二月賊陷夔州圍太平良玉至乃走
十三年扼羅汝才於巫山汝才犯夔州良玉師至乃去已邀
之馬家寨斬首六百追敗之留馬壩斬其魁東山虎復合他
將大敗之譚家坪北平又破之仙寺嶺良玉奪汝才大纛擒
其渠副塌天賊勢漸衰當是時督師楊嗣昌盡驅賊入川川
撫邵捷春提弱卒二萬守重慶所倚惟良玉及張令二軍綿
州知州陸遜之罷官歸捷春使按營壘見良玉軍整心異之
良玉爲置酒語遜之曰邵公不知兵吾一婦人受國恩誼應

死獨恨與邵公同死耳遜之吝以故良玉曰邵公移我自近去所駐重慶僅三四十里而遣張令守黃泥窪殊失地利賊據歸巫萬山顛俯瞰吾營鐵騎建瓴下張令必破令破及我我敗尚能救重慶急乎且督師以蜀爲壑無愚智知之邵公不以此時爭山奪險令賊毋敢卽我而坐以設防此敗道也遜之深然之已而捷春移營大昌監軍萬元吉亦進屯巫山與相應援其年十月張獻忠連破官軍於觀音巖三黃嶺遂從上馬渡過軍良玉偕張令急扼之竹箇坪力戰挫賊會令爲賊所殪良玉趨救不克轉鬪復敗所部三萬人畧盡乃單騎見捷春請曰事急矣盡發吾溪峒卒可得二萬我自廩其半半餼之官猶足辦賊捷春見嗣昌與已左而倉無見糧謝

其計不用良玉乃歎息歸時播黃十三家賊橫蜀中有秦纘
勲者良玉族人也爲賊耳目被禽殺獄卒遁去良玉捕執以
獻無脫者張獻忠盡陷楚地將復入蜀良玉圖全蜀形勢上
之巡撫陳士奇請益兵守十三隘士奇不能用復上之巡按
劉之勃之勃許之而無兵可發十七年春獻忠遂長驅犯夔
州良玉馳援衆寡不敵潰及全蜀盡陷良玉慷慨語其衆曰
吾兄弟二人皆死王事吾以一孱婦蒙國恩二十年今不幸
至此其敢以餘年事逆賊哉悉召所部約曰有從賊者族無
赦乃分兵守四境賊遍招土司獨無敢至石砭者後獻忠死
楚宗人朱容藩承桂王命以都御史入蜀有異志招黃賊白
蛟龍楊秉蔭爲助徵糧於良玉良玉拒之容藩怒將攻良玉

諸帥李占春等不應良玉乃求援於占春占春擊殺蛟龍容
藩覆滅良玉竟以壽終翼明既罷崇禎十六年冬起四川總
兵官道梗命不達而拱明值普名聲之亂連戰挫賊名聲引
交趾兵破副將劉理營標下卒欲走拱明怒手刃之與賊鬪
死贈卹如制

龍在田石屏州土官舍人也天啓二年雲南賊安效良張世
臣等爲亂在田與阿迷普名聲武定吾必奎等征討數有功
得爲土守備新平賊剽石屏在田破走之安效良攻霑益在
田力戰退賊巡撫閔洪學上其功擢坐營都司崇禎二年與
必奎收復烏撒八年鳳陽被寇詔徵雲南土兵在田率所部
應詔擊賊湖廣河南頻有功擢副總兵總理盧象昇檄討襄

陽賊至則象昇已奉詔勤王命屬熊文燦十年在田自穀城
撫張獻忠還其軍擠遼將周元度墮水死帝不罪三月擊擒
大盜郭三海十一年九月大破賀一龍李萬慶於雙溝進都
督同知明年三月大破賊固始斬首三千五百有奇張獻忠
之叛也文燦命在田駐穀城邊賊東突諸將多忌在田而在
田初往穀城頗與獻忠交好讒言日興及文燦被逮在田亦
罷歸還至貴州擊平叛賊安隴壁十五年夏中原盜益張在
田上疏曰臣以石屏世弁因流氛震陵奮激國難捐貲募精
卒九千五百戰象四戰馬二千入楚豫破賊賊不敢窺江北
陵寢滇兵有力焉五載捷二十有八忌口中沮逼臣病歸自
臣罷親藩辱名城屢陷臣妄謂討寇必須南兵蓋諸將所統

多烏合遇寇卽逃乏餉卽譟滇兵萬里長驅家人父子同志非若他軍易潰也且一歲中秋冬氣涼賊得馳騁春夏卽入山避暑養銳而出故其氣益盛夫平原戰旣不勝山蹊又莫敢膺師老財殫蕩平何日滇兵輕走遠跳善搜山臣願整萬衆力掃秦楚豫皖諸寇不滅不止望速給行糧沿途接濟臣誓捐軀報國言而不效甘伏斧鑕帝壯之下兵部議寢不行踰二載乙酉八月吾必奎叛黔國公沐天波檄在田及寧州土知州祿永命協討擊擒之未幾沙定洲作亂據雲南府在田不敢擊明年定洲還攻在田守不下移攻寧州永命死又陷嶧峨在田走大理又明年孫可望等至貴州在田說令攻定洲定洲迄破滅在田歸卒於家普名聲臨安阿迷州土人

也以功授土守備子作遠襲阿迷土知州崇禎四年御史趙洪範按臨安名聲出逐戈甲亘數里洪範與巡撫王伉請討以貴州副將商士杰主兵布政使周士昌監軍大發川貴漢土軍會勦士昌及副將秦拱明死於賊伉洪範皆得罪名聲遂圍臨安久之解去仍乞降總督朱燮元撫定之廣西知府張繼孟入阿迷傾毒藥茶中與名聲易而飲名聲遂毒死其妻萬氏詭言名聲好亂慮禍與家眾縊殺之燮元以聞命其子襲知州吾必奎武定元謀人先世爲土知縣後有罪停襲必奎與龍在田普名聲討叛有功得爲土守備恢復炎方松林諸站通蜀道又與破安效良進坐營都司後以遊擊守炎方崇禎二年巡撫謝存仁命討安邊復烏撒王伉討普名聲

擢必奎副總兵協攻為名聲所誘先逃其後桀驁日甚崇禎十七年張獻忠陷四川黔國公沐天波遣參將李大贄戍金沙江大贄數侵必奎必奎不能堪明年八月舉兵反連陷武定楚雄祿豐諸郡縣十月天波集漢土兵討誅之

明史藁

列傳第一百四十四

明史彙

列傳第一百四十五

光祿大夫

經筵講官明史總裁戶部尚書加七級臣王鴻緒奉

敕編撰

曹文詔

艾萬年

湯九州

楊正芳
楊世恩

陳于王

侯良柱

張令

猛如虎

劉光祚

虎大威

孫應元

姜名武

王來聘
鄧祖禹

劉國能

李萬慶

周遇吉

曹文詔大同人勇毅有智略從軍遼左歷事熊廷弼孫承宗積功至游擊崇禎二年冬從袁崇煥入衛京師明年二月總理馬世龍昇所賜尚方劔令率參將王承胤張叔嘉都司左良玉等伏玉田枯樹洪橋鏖戰有功遷參將又從世龍等克

大安城及鮎魚諸關以興復四城功加都督僉事七月陝西賊熾擢延綏東路副總兵賊渠王嘉胤久據河曲四年四月文詔克其城嘉胤脫走轉掠至陽城南山文詔追及之其下斬以降以功擢臨洮總兵官點燈子自陝入山西文詔追之及於稷山諭降七百人點燈子遁尋被獲伏誅李老柴獨行狼陷中部巡撫練國事延綏總兵王承恩圍之五月慶陽賊郝臨庵劉道江援之會文詔西旋與榆林參政張福臻合勦馱老柴及其黨一條龍餘黨奔摩雲谷副將張弘業游擊李明輔戰死文詔乃與游擊左光先崔宗蔭李國奇分勦綏德宜君清澗米脂賊戰懷寧川黑泉峪綿湖峪封家溝皆大捷埽地王授首紅軍友李都司杜三楊老柴者神一魁餘黨也

屯鎮原將犯平涼國事樛甘肅總兵楊嘉謨副將王性善扼之賊走慶陽文詔從鄜州問道與嘉謨性善合五年三月大戰西濠斬千級生擒杜三楊老柴餘黨糾他賊掠武安監陷華亭攻莊浪文詔嘉謨至賊屯張麻村官軍掩擊賊走高山游擊曹變蛟馮舉劉成功平安等諫而上賊潰走變蛟者文詔從子也會性善及甘肅副將李鴻嗣參將莫與京等至共擊敗之咸寧關又敗之關上嶺追至隴安嘉謨變蛟夾擊復敗之賊餘衆數千欲走漢南爲游擊趙光遠所遏乃走張家川其逸出清水者副將蔣一陽遇之敗都司李宮用被執文詔乃縱反間給其黨殺紅軍友遂蹙敗之水落城追至靜寧州賊奔據唐毛山變蛟先登殄其衆可天飛郝臨庵劉道江

爲王承恩所敗退保鐵角城獨行狼李都司走與合可天飛
劉道江遂圍合水文詔往救賊匿精銳以千騎逆戰誘抵南
原伏大起城上人言曹將軍已歿文詔持矛左右突匹馬縈
萬衆中諸軍望見夾擊賊大敗僵屍蔽野餘走銅川橋文詔
率變蛟舉嘉謨及參將方茂功等追及之大戰陷陣賊復大
敗尋與寧夏總兵賀虎臣固原總兵楊麒破賊甘泉之虎兕
凹麒復追賊安口河崇信窰白茅山皆大獲總督洪承疇斬
可天飛李都司於平涼降其將白廣恩餘賊分窰文詔追擊
之隴州平鳳間十月三戰三敗之遂蹙賊耀州錐子山其黨
殺獨行狼郝臨庵以降承疇戮四百人餘散遣關中巨寇略
平巡撫御史范復粹彙奏首功凡三萬六千六百有奇文詔

功第一嘉謨次之承恩麒又次之文詔在陝西大小數十戰
功最多承疇不爲敘巡按御史吳姓推獎甚至復粹疏復上
兵部抑其功卒不敘當是時賊見陝兵盛多流入山西其魁
紫金梁混世王姬關鎖八大王曹操闖塌天興加哈利七大
部多者萬人少亦半之蹂躪汾州太原平陽御史張宸極言
賊自秦中來秦將曹文詔威名宿著士民爲之謠曰軍中有
一曹西賊聞之心膽搖且嘗立功晉中而秦賊滅且盡宜勅
令入晉協勦於是命陝西山西諸將並受文詔節制六年正
月抵霍州敗賊汾河孟縣追及於壽陽巡撫許鼎臣遣謀士
張宰先大軍嘗賊賊驚潰六月文詔追擊之斬混世王於碧
霞村餘黨爲猛如虎遂走遇文詔兵方山復敗五臺孟定襄

壽陽賊盡平鼎臣命文詔軍平定備太原東張應昌軍汾州備太原西文詔連敗賊太谷范村榆社太原賊幾盡帝以文詔功多敕所過地多積糗糧以犒并敕文詔速平賊山西監視中官劉中允言文詔勦賊徐溝孟定襄所司不給米反以砲石傷士卒帝卽下御史按問三月賊從河內上太行文詔大敗之澤州賊走潞安文詔至陽城遇賊不擊自沁水潛師還擊之斬首千餘四月賊屯潤城其他部陷平順殺知縣徐明揚文詔至賊走乃夜半襲潤城斬賊千五百紫金梁老回回自榆社走武鄉過天星走高澤山文詔皆擊敗他賊圍涉縣聞文詔破賊黎城解去五月帝遣中官孫茂霖爲文詔內中軍賊犯沁水文詔大敗之擒其魁大虎又敗之遼城毛嶺

山西賊旣累敗乃避文詔鋒多流入河北帝乃命文詔移師往討而賊已敗鄧玘兵於林縣文詔率五營軍夜襲破之七月大敗懷慶賊馘其魁滾地龍又追斬老回回於濟源文詔在洪洞時與里居御史劉令譽忤及是令譽按河南而四川石砮士官馬鳳儀軍敗沒於侯家莊賴文詔馳退賊甫解甲與令譽相見語復相失文詔拂衣起面叱之令譽怒遂以鳳儀之敗爲文詔罪部議文詔怙勝而驕乃調之大同七年七月

大清兵西征插漢還師入大同境攻拔得勝堡參將李全自經遂攻圍懷仁縣及井坪堡應州文詔偕總督張宗衡先駐懷仁固守八月圍解卽移駐鎮城挑戰敗還已而靈丘及他

屯堡多失陷

大清兵亦旋十一月論罪文詔宗衡及巡撫胡沾恩並充軍邊衛令甫下山西巡撫吳牲薦文詔知兵善戰請用之晉中乃命爲援勦總兵官立功自贖當是時河南禍尤劇帝已允兵部議敕文詔馳勦河南賊牲復抗疏力爭請令先平晉賊後入豫帝不許而文詔以牲有恩竟取道太原爲牲所留會賊高加計已殲而鳳陽告陷遂整兵南以八年三月會總督吳承疇於信陽承疇大喜卽令擊賊隨州文詔追斬賊三百八十有奇四月承疇次汝州以賊盡入關中議還顧根本分命諸將扼要害檄文詔入關文詔乃馳至靈寶謁承疇承疇以賊在商維聞官兵至必先走漢中而大軍由潼關入反在

其後乃令文詔由闕鄉取山路至雒南商州直擣賊巢復從山陽鎮安洵陽馳入漢中遏其奔軼曰此行也道路回遠將軍甚勞苦吾集關中兵以待將軍拊其背而遣之文詔躍馬去五月五日抵商州賊去城三十里營火滿山文詔夜半率從子參將變蛟守備鼎蛟都司白廣恩等敗賊深林中追至金嶺川賊據險以千騎逆戰變蛟大呼陷陣諸軍並進賊敗走變蛟勇冠三軍賊中聞大小曹將軍名皆怖懼已而闖王八大王諸賊犯鳳翔趨汧陽隴州文詔自漢中馳赴賊盡向靜寧泰安清水秦州間衆且二十萬承疇以文詔所部合張全昌張外嘉軍止六千衆寡不敵告急於朝未得命六月官軍遇賊亂馬川前鋒中軍劉弘烈被執俄副將艾萬年柳國

鎮復戰死文詔聞之瞋目大罵亟詣承疇請行承疇喜曰非將軍不能滅此賊顧吾兵已分無可策應者將軍行吾將由涇陽趨淳化爲後勁文詔乃以三千人自寧州進遇賊真寧之湫頭鎮變蛟先登斬首五百追三十里文詔率步兵繼之賊伏數萬騎合圍矢螬集賊不知爲文詔也有小卒縛急大呼曰將軍救我賊中叛卒識之悉賊曰此曹總兵也賊喜圍益急文詔左右跳蕩手擊殺數十人轉鬪數里力不支拔刀自刎死游擊平安以下死者二十餘人承疇聞拊膺大哭帝亦痛悼贈太子太保左都督賜祭葬世廕指揮僉事有司建祠春秋致祭文詔忠勇冠時稱明季良將第一其死也賊中爲相慶弟文燿從兄征討數有功河曲之戰斬獲多後擊賊

忻州戰死城下詔予贈卹從子變蛟自有傳

艾萬年米脂人由武學生從軍積功至神木參將崇禎四年從曹文詔復河曲點燈子入山西萬年從文詔連敗之桑落鎮花地窰霧露山都司王世虎守備姚進忠戰死賊退屯石樓之康家山西拒河三十里綏德知州周士奇守備孫守法伏兵舍峪渡河襲殺之五年從參政樊一蘅討平不沾泥山西告警隸文詔東征與李卑一月奏五捷又與賀人龍敗八大王埽地王兵明年賊將東遁連破之延安山充義村賈寨村擢副總兵初山西旣中賊其土寇亦乘間起三關王剛孝義通天柱臨縣王之臣皆殘破城邑後見賊衰相繼歸順然陰結黨不散巡撫戴君恩新視事謀誅之七年正月迎春召

王剛宴殺之并殺通天柱於他所而萬年亦捕殺王豹五與其黨領兵王生禽翻山動姬關鎖掌世王獻俘京師晉中巨盜略靖豹五卽之臣也有議君恩殺降者給事中張第元力言諸賊蹂躪之慘請錄萬年功萬年適遘疾告歸尋加署都督僉事八年二月上疏言臣仗劔從戎七載復府谷解孤山圍救清水黃甫木瓜十一營堡轉戰高山設伏河曲有馬鎮虎頭巖石臺山西川之捷戰平陽汾州太原復臨縣及蹶亭驛大小數十戰精力盡耗與臣共事者李甲溘先朝露臣病勢淹淹猶力戰冀北又撫勦王剛豹五領兵王通天柱解散賊一萬三千有奇蒙恩許臣養病而督臣洪承疇檄又至臣不敢不力疾上道但念滅賊之法不外勦撫今勦撫俱未合

機宜臣不得不極言夫勦賊不患賊多患賊走蓋疊嶂重巒皆其淵藪兵未至而賊先逃所以難滅其故則兵寡也當事非不知兵寡因糗糧不足爲苟且計日引月長以至於今雖多措餉多設兵而已不可救矣宜合計賊衆多寡應用兵若干餉若干度其足用然後審察地利用正用奇用伏用間或擊首尾或衝左右有不卽時殄滅者臣不信也次則行堅壁清野之法困賊於死地然後可言撫蓋羣賊攜妻挈子無城柵無輜重暮楚朝秦傳食中土以剽掠爲生誠令附近村屯移入城郭儲精兵火器以待之賊衣食易盡生理一絕烏驚鼠竄然後選精銳據要害以擊之或體陛下好生之心誅厥渠魁宥其脅從不傷仁不損威乃撫勦良策帝深嘉之下所

司議行然卒不用其策以致賊日熾尋授孤山副總兵戍平涼當是時總督洪承疇迫六月滅賊之期急進戰諸將見賊衆兵寡咸自揣不敵而勢不可止萬年及副將劉成功柳國鎮游擊王錫命合兵三千以六月十四日至寧州之襄樂遇賊大戰斬首數百伏兵驟起圍之數重萬年國鎮力戰不支皆戰歿成功錫命負重傷歸士卒死者千餘人事聞贈恤如制

湯九州石埭人崇禎時爲昌平副總兵六年夏流賊大擾河北畿南命九州協勦與左良玉等屢破賊兵賊悉渡河而南其冬大敗過天星於吳城鎮斬首四百二十級追賊闖天王等五華集又敗之斬首六百四十餘級七年擊賊嵩縣之潭

頭斬首三百二十級賊駐商維謀再入山西左良玉迎擊於商南九州遣部將趙柱周爾敬逆之維南賊至商州返已復侵闖鄉九州病遣部將凌元機胡良翰等搜山悉敗歿九州尋赴援山西未幾以河南勦賊功加署都督僉事八年春被劾褫官從軍自效洪承疇入關以吳村瓦屋爲商南賊走內鄉浙川要地令九州偕良玉扼之尋移駐洛陽九年二月賊走登封石陽關與伊嵩賊合九州期良玉夾擊良玉半道歸九州以孤軍千二百人由嵩縣深入賊屢敗窮追四十餘里悞入深崖遇賊數萬據險攻圍九州勢不敵夜移營爲賊所乘遂戰歿從孫文瓊伏闕三上書請恤不報文瓊後亦殉難時有楊正芳者天啓間以小校從軍屢勦貴州賊積功至副

總兵敘姚江壩功加署都督同知崇禎三年擊破定番叛苗
七年賊陷當陽正芳以鎮守兵敗賊班鳩灘復其城湖廣巡
撫唐暉以獻陵惠藩爲重令正芳及總兵許成名專護荊州
承天正芳連奏金沙鋪蓮花坪白溝坪官田石門山之捷陳
奇瑜出師鄖陽正芳偕成名鄧玘從竹山竹溪白河分道進
皆大獲至十月正芳督募兵千餘援雒南戰敗及部將張上
選皆死焉一軍盡歿贈太子少師左都督世廕指揮同知再
廕一子守備賜祭葬有司建祠又有楊世恩者崇禎時歷官
湖廣副總兵七年春敗賊竹溪大雨山水驟發賊多漂溺死
餘潰走世恩疾擊斬鎮山虎等四十餘人已追賊石泉壩連
戰康家坪蚬溪功最八年冬敗賊孝感九年春祖寬大破賊

滁州世恩從盧象昇馳至復大破之十年春與秦翼明破劉國能於細石嶺獲其魁新來虎賊陷隨州責戴罪自贖十二年冬督師楊嗣昌令守宜城會賊羅汝才惠登相分屯興山遠安夷陵告急嗣昌檄世恩及荊門守將羅安邦赴救至洋坪猴兒洞道險甚嗣昌再檄召還而安邦由祚峪世恩由重陽坪已兩道深入期至馬良坪合兵汝才登相圍之香油坪嗣昌連發數道兵往援皆以道遠不能進世恩等被困久突圍走黃連坪絕地無水土饑渴甚賊至兩軍盡覆世恩安邦並死

陳于王字丹衷吳縣人世爲蘇州衛千戶旣襲職兩舉武鄉試授奇兵營守備以捕獲海盜功遷都司僉事守崇明蛇山

盜王一爵等亂海濱于王率戰艦數十擊之羊山持刀躍入其舟生擒一爵殲其黨殆盡上官交薦遂知名天啓初經略熊廷弼用爲標下參將代者至飲于王酒暴卒其子訴于王毒殺之逮繫久不釋崇禎二年京師有警巡撫曹文衡賞其罪署前鋒游擊將兵勤王旣至兵事已解遂南還久之巡撫張國維用爲中軍守備九年賊入江北圍廬州陷和州國維遣于王守六合守備蔣若來守江浦賊方圍江浦若來急入與知縣李維樾固守賊登城若來拒却之絕下角賊矢著其頰左臂傷裹血還戰賊乃退六合無城若來與于王犄角捍賊二邑賴以全後犯宿松于王弟國計偕指揮包文達等以二千人往救文達敗歿于王驟馬入拔其弟而出十年正月

賊分犯江浦六合及安慶國維遣部將張載賡等援安慶而以新募兵二千令副將程龍及于王若來分戍二邑已而賊不至國維議赴安慶城太湖乃提龍等三將兵西上三月賊犯太湖副將潘可大將安慶兵九百龍等三將將吳中兵三千六百禦之酆家店賊先犯可大營龍等至夾擊之賊多死夜復至中伏亦敗去監軍史可法欲退扼要害諸將不從掘塹守二十四日羅汝才劉國能等七營數萬衆齊至圍數重諸將突擊頗有殺傷可法偕副將許自強馳救扼於賊鳴大砲遙爲聲援諸將亦呼譟突圍會天雨甲重不得出明日日中賊四面入將士短兵接戰可大戰死龍引火自焚死于王手執大刀左右殺賊傷重力竭北面叩頭自刎死閱十日面

色如生若來服圍人衣以免同死者武舉詹兆鵬首觸石死
陸王猷殺賊過當賊鬻分其肉死莫是驛唐世龍及千戶王
定遠皆力戰死百戶王弘猷賊鋸齒斷足罵不絕聲死士卒
脫者僅千餘人事聞贈于王昭勇將軍指揮使世廕副千戶
餘贈廕有差

侯良柱字朝石永寧衛人天啓初累官四川副總兵討奢崇
明父子復遵義城又與參議趙邦清招降奢寅黨安變六年
五月代李維新爲四川總兵官鎮永寧時崇明敗奔水西與
安邦彥合貴州兵數討不克崇禎二年總督朱燮元遣貴州
總兵許成名復赤水衛崇明邦彥以十餘萬衆來爭成名還
永寧賊追之銳甚良柱偕監軍副使劉可訓出戰小却成名

等來援賊乃據五峰山桃紅壩越數日良柱乘賊不備與副將鄧玘等侵早霧迫之賊大潰成名聞山上呼譟聲亦出賊奔鵝項嶺徑長而陘人馬不能容良柱玘軍至賊復大敗死者數萬人崇明邦彥與邦彥黨僞都督莫德並授首俘其黨梟作等數十人積年巨寇平時稱西南奇捷四川巡撫張諭上其功不及黔將成名等怒言邦彥德乃已部將趙國璽所斬且崇明猶未死變元信之奏於朝兵部不能決賞久不行御史孫徵蘭言訊俘囚阿癡楊作等咸云邦彥即時授首灼然非黔兵力帝卽命獻俘告廟傳首九邊川中撫按及御史毛羽健皆訟良柱可誦功詆變元變元疏辨且求去賞遂格不行良柱怨變元不爲用至與相許奏解職候勘久之御史

劉宗祥列上功狀七年八月始錄前功進良柱左都督世廕
錦衣指揮僉事成名等亦優敘未幾復爲四川總兵官八年
夏總督洪承疇大舉討賊令良柱扼賊入川路戰鳳縣三江
口斬首三百七十有奇明年冬賊犯漢中瑞王遣使乞師良
柱督兵援與他將同却賊十年四月川中地震者七地鳴者
一占主兵賊果入犯陷南江通江帝切責良柱及巡撫王維
章時良柱駐廣元盡召諸地兵九千有奇分防扼險止餘二
千人賊知其勢弱五月復寇川北維章告急於朝會賊轉掠
他所良柱乃撤還守隘兵專守廣元維章以爲非計上章言
之十月李自成過天星混天星等陷寧羌分三道入寇良柱
急拒戰於綿州衆寡不敵陣亡賊直逼成都維章方守保寧

反在外連失三十餘州縣帝大怒命逮二人下詔獄猶未知
良柱死獄成維章遣戍追奪良柱官十三年良柱子指揮天
錫伏闕言臣與賊不共戴天願捐貲繕甲選募勁旅及臣父
舊將自當一隊與賊血戰下雪父恥上報國恩帝深嘉之命
授游擊赴楊嗣昌軍立功已嗣昌言天錫所將親丁二百六
十人及召募精卒五六百人皆剽悍敢戰帝益嘉之再增一

秩

張令永寧宣撫司人天啓元年奢崇明反以令爲總兵從攻
成都令雖爲賊用非其志崇明敗歸永寧令結宋武等乘間
擒其僞丞相何若海率衆以降崇明怒殺令一家夷其先墓
巡撫朱燮元言令等爲國忘家請優擢示勸命與武並授參

將後屢從大軍征討頻有功加副總兵仍視參將事後實授
建武游擊崇禎中屢遷副總兵鎮川北七年流賊入犯總兵
張爾奇以令爲先鋒副將陳一龍武聲華爲左右翼拒之員
山令追至龍潭一龍等不至面中三矢斬賊百餘級而還已
賊犯略陽令又擊敗之扼保寧漢中諸要害秦賊不敢犯十
年冬李自成等陷四川三十餘州釋總兵侯良柱陣亡令獲
免楊嗣昌之督師也張獻忠等悉奔興安爲令所扼不得入
漢中乃轉寇夔州十三年二月大敗瑪瑙山走岔溪于江河
令復與副將方國安大破之令時年七十餘馬上用五石弩
中必洞胷軍中號神弩將獻忠轉入柯家坪其地亂峰錯峙
菁深道險令率衆追及之分其下爲五鼓勇爭利賊衆官軍

寡國安爲後距他道逸去令獨深入被圍居絕坂中屢射賊營應弦斃者甚衆水遠士渴賴天雨以濟圍終不解襄陽監軍僉事張克儉言於總督鄭崇儉曰張令健將柰何棄之急令參將張應元汪之鳳從八台山進總兵賀人龍從滿月槽進三月八日應元等先至令方與賊鬪呼聲動山谷應元等應之內外夾擊賊乃敗去令與賊萬餘相持十三日所殺傷過當其卒僅五千耳時巡撫邵捷春駐重慶遣守黃泥窪倚令及秦良玉爲左右手後捷春移大昌以令守竹筒坪防賊逸九月獻忠兵大至令力戰中矢死軍遂敗之鳳旣解柯家坪圍後與應元同守夔州之土地嶺部卒多新募獻忠盡銳來攻之鳳應元力戰賊分兵從後山下突入其營應元突圍

出之鳳走他道免山行道渴飲斗水臥血凝臆而死踰月令亦戰死軍中失二將爲奪氣

猛如虎本塞外降人家榆林積功至游擊崇禎五年擊邢紅狼於高平解其圍明年敗賊壽陽黑山覆姬關鎖軍已從曹文詔追賊西偃碧霞村斬混世王與頗希牧逐賊壽陽東又與陳國威馬杰破來遠寨從文詔大破賊范村國威以步卒三百夜劫賊紅山嶺如虎杰及虎大威和應詔擊殺九條龍尋以巡撫許鼎臣命由文水入山勦賊又與大威應詔杰由臯落山勦東犯之賊並有功賊流入畿南山西警漸息如虎仍隸鼎臣七年勦賊沁源馘五條龍如虎驍果善戰與虎大威齊名戴君恩吳牲相繼爲巡撫並委任之以功進參將其

年冬賊在河南欲乘冰北渡如虎大威扼之河濱八年二月
興大威國威斬劇賊高加計山西賊盡平用牲薦加副總兵
其冬以防河功加署都督僉事連歲防河及援勦河南賊勞
績甚著十一年冬京師有警如虎督兵勤王明年四月擢薊
鎮中協總兵官十三年坐事落職發邊方立功督師楊嗣昌
請於朝令從入蜀十一月監軍萬元吉大饗將士於保寧以
諸軍進止不一擢如虎爲正總統張應元副之率軍趨綿州
分遣諸將屯要害而元吉自間道走射洪扼蓬溪以待賊賊
方屯安岳界偵官軍且至宵遁抵內江如虎簡驍騎追之元
吉應元營安岳城下以扼其歸路十二月張獻忠陷瀘州其
地三面阻江惟立石站可北走元吉以賊居絕地將遣大兵

南擣其老巢而伏兵旁塞玉蟾寺蹙賊北竄永川逆而擊之可盡殄永川知縣已先遁城中止丞簿一二人如虎覓嚮導不可得夜宿西關空舍及抵立石賊已先渡南溪返走關中將賀人龍軍隔水不擊賊遂越成都走漢州德陽渡綿河入巴州明年正月嗣昌親統舟師下雲陽檄諸將陸追賊諸軍乃盡躡賊後賊折而東返歸路悉空不可復遏如虎所將止六百騎餘皆左良玉部兵驕悍不可制所過肆焚掠惟參將劉士杰勇敢思立功諸軍從良玉多優閒不戰改隸如虎馳遂山谷風雪中咸怨望謠曰想殺我左鎮跑殺我猛鎮時人龍兵已大譟西歸所恃止如虎元吉深憂之賊自巴州至開縣官軍追之遇諸黃陵城日晡雨作諸將疲乏請詰朝戰士

杰奮曰四旬逐賊今始及之舍弗擊我不能也執戈先如虎
激諸軍繼之士杰所當輒摧陷獻忠登高望官軍見無後繼
密抽壯騎潛行箐谷中乘高大呼馳下良玉兵先潰士杰及
游擊郭開如虎子先捷並戰死如虎率親兵力戰部將挾上
馬潰圍出旗纛軍符盡失乃收殘卒從嗣昌下荊州及嗣昌
死率所部扼德安黃州會疽發背不能戰退屯承天尋移駐
南陽十一月李自成覆傅宗龍兵乘勝來攻如虎與劉光祚
憑城固守用計殺賊精卒數千已而城破如虎持短兵巷戰
大呼衝擊血盈袍袖過唐府門北面叩頭謝上恩自稱力竭
爲賊搃死光祚字鴻基榆林衛人初爲諸生棄去承祖廕歷
官延綏游擊崇禎三年奉詔勤王與何可綱等戰灤州有功

遷汾州參將五年與游擊王尚義敗賊張有義於臨縣賊還兵犯之軍盡覆光祚僅以身免被徵未行偕諸將復臨縣詔除其罪六年賊犯石樓光祚分三道擊大敗之斬隔溝飛撲天虎等六人獲首功三百七十已又數敗賊於臨縣永寧撲天飛等詐降光祚設伏斬之七年勦敗王剛餘黨斬四百餘級加署都督僉事爲山西副總兵敗賊崞縣復其城八年賊渠賀宗漢號活地草者見其黨劉浩然高加計破滅僞乞降光祚伏兵斬之晉中羣盜皆盡乃移光祚於宣府久之命率兵援勦河南十一年連敗賊白果圍襄城已擢保定總兵官仍協討河南賊其冬畿輔有警馳還鎮

大清兵薄保定以光祚堅守不攻而去光祚尋從總督孫傳

庭南下明年二月

大清兵還至渾河值水漲輜重難渡諸將王樸曹變蛟等相顧不敢擊光祚懼尤甚視師大學士劉宇亮劾之詔卽軍前正法光祚適報武清堦宇亮乃繫之武清獄而拜疏請寬帝怒罷宇亮論光祚死十四年大學士范復粹錄囚力言光祚才武命充爲事官戴罪辦賊光祚舉廢將尤翟文等帝亦從之當是時賊已陷河南襄陽中原郡縣大抵殘破光祚士馬無幾督師丁啓睿尤怯光祚雖少有克捷而賊勢轉盛及傳宗龍敗歿於項城南陽震恐光祚適經其地唐王邀與共守城陷遂死

虎大威榆林人本塞外降卒勇敢嫻將略從軍有功累官山

西參將崇禎三年冬從總兵尤世祿擊王嘉胤於河曲力獲被傷五年從總督張宗衡勦賊陵川潞安陽城沁大連勝之明年從巡撫許鼎臣擊賊介休殲其魁九條龍時賊去山西遁據輝林武涉山中約二萬餘鼎臣令曹文詔自黎城入大威猛如虎諸將自臯落山入賊屢敗尋移大威守平陽七年遭撫吳甦至察諸將中惟大威如虎沈毅可屬兵事委任之其冬與如虎扼賊渡河高加計據苛嵐四出剽掠明年三月二將追至忻代山中加計馬上舞三十斤長挺突陣大威射獲之追斬其衆五百人餘黨悉平甦薦二人忠勇進大威副總兵其冬以扼賊功加署都督僉事九年八月畿輔被兵率師入援明年春命援勦陝西賊遂代王忠爲山西總兵官上

疏言諸將討賊零級不可取生口不可貪封域不可限帝採
納之十一年詔兵部甄別諸大將大威以稱職增秩其年冬
京師戒嚴命總督盧象昇統大威及宣府總兵楊國柱大同
總兵王樸入衛尋從象昇轉戰至鉅鹿賈莊被圍數匝象昇
死焉大威等潰圍出督師劉宇亮總督孫傳庭皆言大威國
社敢勇身入重圍視他將異乞令立功自贖大威亦上章請
罪帝不從卒解其任尋令從軍辦賊十四年正月李自成圍
開封總督楊文岳遣大威及副將張德昌先率五千人渡河
會賊已解圍去乃會河南巡撫李仙風於偃師以兵少未敢
擊賊待文岳軍至與賊戰鳴臯大破之又與監軍道任棟挫
賊平峪七月自成及張獻忠羅汝才攻鄧州大威從文岳擊

破之斬首千餘級陝西總督傅宗龍出關討賊文岳大威會之九月次新蔡抵孟家莊將戰秦帥賀人龍軍先潰大威軍亦潰遂奔沈丘賊連陷河南鄧許再圍開封大威從文岳援之賊引去明年二月師次郟城督師丁啓睿總兵左良玉方與賊鏖戰文岳督大威及馮大棟張鵬翼等合擊賊大敗相持十一晝夜俘斬數千賊遂東陷陳州歸德已復圍開封七月朔啓睿文岳大威及良玉楊德政方國安之師畢會啓睿欲急擊良玉不從先走大威諸軍亦走帝大怒立誅德政黜謹啓睿諸人大威時奔汝寧出攻賊寨中砲死乃免其罪大威爲偏裨最有聲及爲大帥值賊勢益張所將止數千人不能大有所挫然身經數十戰卒死王事論者賢之

孫應元不知何許人歷官京營參將督勇衛營勇衛營卽騰
驥武驥四衛也其先隸御馬監專牧馬莊烈帝銳意修武備
簡應元及黃得功周遇吉等訓練遂成勁旅崇禎九年秋從
張鳳翼軍畿輔有功進副總兵再以功增秩一等明年河南
賊熾應元得功慷慨請行帝壯之發卒萬人監以中官劉元
斌盧九德戒毋擾民諸將奉命軍行肅然十二月大破賊鄭
州再破之密縣先後斬首千七百明年正月大破之舞陽光
山固始四日三捷斬首二千九百有奇賊乃謀犯江北元斌
九德南趨潁州護鳳陵密遣應元得功督騎兵扼賊前自南
而北破之方家集賊遂由固始走商城錄功加都督僉事已
復破之新野又大破之遂平熊文燦方主撫不戰而賊憚應

元等多降降者亦不遽叛文燦以此擅撫賊功已而京師有警召應元等還賊遂無所忌帝初聞禁軍屢破賊大喜累加應元都督同知賜銀幣蟒服至是論功遂進左都督加銜總兵官世廕錦衣副千戶十二年五月張獻忠羅汝才復叛仍命元斌九德監應元得功軍南征應元等馳至南陽會馬光玉屯淅川之吳村偽乞撫規渡漢江應獻忠淅川知縣郭守邦說降其黨許可變胡可受可變卽賊改世王可受則安世王也可變夜至處之東關可受爲光玉所持約未定應元得功趨內鄉掩其背令副將周遇吉等分道別擊之文燦所遣陳洪範亦至八月至小黃河口參將馬文身等力戰可受敗呼曰始與許王約降者我也今歸命遇吉駐馬受之應元得

功遂進兵王家寨賊分屯南北兩山用木石塞道應元率文
勇戰其南得功率副將林報國戰其北河南兵又扼華陽關
賊遂大敗光玉遁免元弑至軍檄除可變可受罪授以官報
先後首功三千人及楊嗣昌督師襄陽令元弑應元戍荆門
護獻陵十三年七月與副將王允成王之綸監軍僉事孔貞
會等大破羅汝才於豐邑坪斬首二千三百生擒五百有奇
混世王小秦王皆降時稱荆楚第一功十五年春擊賊羅山
力戰孤軍無援遂陣歿贈卹如制應元善戰在行間多與黃
得功偕應元死得功勲益顯故其名尤震於世

姜名武字戎揚保德州人舉天啓二年武會試授大同威遠
守備崇禎初遷大水峪游擊築杏山城有功遷宣府西城參

將擊斬大盜王科移守宣府右衛擢通州副總兵護諸陵有功以故官典保定總督楊文岳中軍兼忠勇營團練事十五年李自成圍開封急名武從文岳往援時諸軍壁朱仙鎮者十餘萬左良玉最強一夕其軍大譟突諸營諸營驚潰其軍遂乘亂掠諸營馬羸以去於是諸營悉奔獨名武一軍堅壁不動侵晨賊大至督麾下血戰殺數百人力竭被執大罵爲賊磔死贈特進榮祿大夫右都督廕外衛世襲總旗其子援王來聘甄奇傑例乃議贈特進光祿大夫左都督世廕錦衣百戶疏上踰月而都城陷不果行來聘京師人崇禎四年中武會試時帝銳意重武舉子運百斤大刀者止來聘及徐彥琦二人而彥琦不與選帝下考官及監試御史獄悉貶兵部

鄭二十二人造詞臣倪元璐等覆閱取百人視文榜例分三甲傳臚錫宴以前三十卷進呈欽定一甲三人來聘居首卽授副總兵武榜有狀元自來聘始也來聘旣拜命泫然流涕曰上重武若此欲吾儕效命疆場爾不捐軀殺賊何以報上恩明年孔有德據登州叛官軍攻之久不下又明年二月以火藥轟城城壞將士踴入輒爲賊擊退來聘復先登中傷而死天子惜之贈廕有加奇傑亦官副總兵隸楊文岳麾下從擊賊河南戰死又有鄧祖禹者斬水人舉萬曆四十七年武會試授瀋陽守備嘗出戰中矢死夜半復甦創甚告歸崇禎初起宣府游擊入衛京師副將申甫軍歿祖禹力戰蘆溝橋擢涿州參將疏請召對不許入朝上書聲甚厲爲御史所糾

下獄然帝頗採其言久之赦出爲辰沅參將擒苗酋飛天王張五保斬首千五百級夷其巢擢副總兵轄德安黃州攻賊土壁山盡掩所獲爲已有當事將劾之請勦寇自贖乃令援應城將七百人入城賊大至圍數重祖禹突圍保西城外賊復圍之軍敗被執賊說降怒罵不屈賊言之再三復罵曰若此須換却心肝賊笑曰換不難遂剖心剗肝而死

劉國能延安人始與李自成張獻忠輩同爲盜自號闖塌天崇禎三年大亂陝西已渡河而東寇山西轉掠畿南河北六年冬入河南遂由內鄉浙川犯湖廣鄖襄破數縣明年正月入四川陷夔州折而東入鄖陽境爲總督陳奇瑜所蹙走漢南同困車箱峽已得出復大亂陝西再入河南踰江北官軍

逼之與整齊王屯商雒山間九年復偕闔王蝎子塊等出鄭襄趨興安漢中總督洪承疇奔命不暇尋南走荆襄與總兵秦翼明數戰其冬與蝎子塊等十七營窺潼關巡撫孫傳庭扼之引而南明年聞馬光玉等將犯鄭黃率衆會之直趨江北官軍數道邀擊乃不敢東還走黃陂入木蘭山轉寇河南敗參將李春貴兵將迫開封詔諸將發兵援乃南走黃麻當是時總理熊文燦新至賊憚之見其下招降令頗有欲歸正者國能先與張獻忠有隙慮爲所并後又與左良玉戰敗乃以十一年正月四日率先就撫於隨州頓首文燦前曰愚民陷不義且十載賴公前洗更生願悉衆入軍籍身隸麾下盡死力文燦大喜慰撫之署爲守備令隸良玉軍國能受約束

無異志已而張獻忠羅汝才亦降皆據邑自固獨國能從軍
征勦數有功明年二月從良玉勤王有詔還討賊獎勵之命
兵部授官錄其部下將士曰獻忠能立功視此遂授國能副
總兵四月良玉會師南陽擊李萬慶國能分擊賊潰遂招萬
慶降其秋獻忠汝才並反文燦遣國能率萬慶兵會討遂並
守邯陽旣而李自成擾河南復移守葉縣初國能爲盜時與
自成汝才輩結爲兄弟及國能歸正自成輩深恨之十四年
九月圍其城四面力攻國能不能支城遂陷被執賊猶好謂
之曰若我故人也何不降國能瞋目罵曰我初與若同爲賊
今則王臣也何故降賊遂殺之事聞贈左都督特進榮祿大
夫建祠萬慶延安人崇禎初與張獻忠羅汝才等並反賊中

所稱射場天者是也起陝西蔓山西畿南河北渡河殘河南
出沒湖廣四川還趨鄖陽入興安困於車箱峽出險益大肆
八年春賊七十二營會滎陽議分兵隨所向令萬慶及許可
變助馬進忠橫天王西當陝兵已而諸路之賊盡萃於陝總
督洪承疇彌歲不能定益恣出沒於河南湖廣凡十五家迨
十一年春國能獻忠降萬慶等大謀而去改稱十三家勢頗
衰而文燦擁兵德安不敢擊萬慶等復大振李自成向關中
萬慶及馬光玉馬進忠羅汝才惠登相賀一龍蘭養成順天
王順義王九家最著八月進忠光玉大挫於潼關九月鄖襄
賊又大敗於雙溝汝才率九營走均州萬慶率三營走光固
十一月汝才亦降自成又大敗關內勢益衰惟萬慶光玉一

龍順天王最勁而萬慶得馬士秀杜應金所劫左良玉賄富且強管麻城徙信陽十二年正月戰敗徙應山德安會光玉進忠等皆大敗進忠懼而降而順天王已死一龍養成伏深山登相遠掠秦蜀萬慶勢益孤文燦檄良玉擊之唐縣姚梁分三營肄賊逐入三山裨將王修政趨利戰死文燦收二營卒令良玉感之內鄉萬慶等在赤眉城四平岡依山結壘請降良玉慮其詐謀之文燦益調諸將陳永福羅岱金聲桓之兵會於賈宋大勦萬慶及光玉可變副將國能亦至由張家林七里河分擊賊大奔良玉遣國能以二十騎往偵且諭萬慶降萬慶馳見輸情國能遂執許州叛黨于汝虎以降處內鄉城下者四千人士秀應金見進忠萬慶降而懼復來歸有

劉喜才者夜取順義王首以獻餘黨推可變爲主與胡可受
皆降自是羣盜大衰至五月獻忠復叛汝才率其黨九營應
之復大熾而萬慶進忠以徒衆旣散無二心萬慶願從征自
効比國能給餉遂授爲副總兵與國能守鄖陽獻忠等方大
亂蜀中鄖境得無事十四年獻忠突陷襄陽鄖守如故明年
正月總督汪喬年討賊以萬慶從至襄城軍潰入城賊攻圍
之固守五日城陷喬年死萬慶亦不屈死事聞贈都督同知
榮祿大夫立祠襄城奉祀

爲遇吉錦州衛人少有勇力好射生後入行伍戰輒先登積
功至京營佐擊京營將多勛戚中官子弟見遇吉質魯意輕
之遇吉曰公等皆執袴子豈足當大敵何不於無事時練膽

勇爲異日用而徒糜廩祿爲同輩咸目笑之崇禎九年都城被兵從尚書張鳳翼數血戰有功連進二秩爲前鋒營副將明年冬從孫應元等討賊河南戰光山固始皆大捷十一年班師進秩受賚明年秋復出討賊破胡可受於浙川降其全部楊嗣昌出師襄陽遇吉從中官劉元斌往會會張獻忠將至房縣嗣昌策其必窺渡鄖灘遣遇吉扼守槐樹關張一龍屯光化賊遂不敢犯十二月獻忠敗於興安將走竹山竹溪遇吉復以嗣昌令至石花街草店扼其要害賊自是盡入蜀遇吉乃從元斌駐荆門專護獻陵明年與孫應元等大破羅汝才於豐邑坪又明年與黃得功追破賊鳳陽已而旋師敗他賊李青山於壽張追至東平殲滅幾盡青山遂降屢加太

子少保左都督十五年冬山西總兵官許定國有罪論死以
遇吉代之至則汰老弱繕甲仗練勇敢一軍特精明年十二
月李自成陷全陝將犯山西遇吉以沿河千餘里賊處處可
渡分兵扼其上流以下流蒲坂屬之巡撫蔡懋德而請濟師
於朝朝廷遣副將熊通以二千人來赴十七年正月遇吉令
通防河會平陽守將陳尚智已遣使迎賊諷通還鎮說降遇
吉叱之曰吾受國厚恩寧從爾叛逆且爾統兵二千不能殺
賊反作說客耶立斬之傳首京師至二月七日太原陷懋德
死之賊遂陷忻州圍代州遇吉先在代遏其北犯乃憑城固
守而潛出兵奮擊連數日殺賊無算會食盡援絕退保寧武
賊亦踵至大呼五日不降者屠其城遇吉四面發大砲殺賊

萬人火藥且盡外圍轉急或請甘言紿之遇吉怒曰若輩何怯耶今能勝一軍皆忠義卽不支縛我子賊於是設伏城內出弱卒誘賊入城亟下閘殺數千人賊用砲攻城圯復完者再傷其四驍將自成懼欲退其將曰我衆百倍於彼但用十攻一番進蔑不勝矣自成從之前隊死後復繼官軍力盡城遂陷遇吉巷戰馬蹶徒步跳蕩手格殺數十人身被矢如蝟竟爲賊執大罵不屈賊縣之高竿叢射殺之復鬻其子成士民感遇吉忠義咸巷戰殺賊不可勝計其舍中兒先自死吉出鬪死亾略盡夫人劉氏素勇健率婦女數十人據山巔公廨登屋而射每一矢斃一賊賊不敢逼縱火焚之闔家盡死自成集衆計曰寧武雖破吾將士死傷多自此達京師歷

大同陽和宣府居庸皆有重兵倘盡如寧武吾部下寧有子
遺哉不如還秦休息圖後舉刻期將遁而大同總兵姜瓖降
表至自成大喜方宴其使者宣府總兵王承蔭表亦至自成
益喜遂決策長驅抵大同宣府抵居庸太監杜之秩總兵唐
通復開門延之京師遂不守矣賊每語人曰他鎮復有一周
總兵吾安得至此福王時贈太保諡忠武列祀旌忠祠

明史彙

列傳第一百四十五終